


# NKONKO NÈ MANDAMUNA

## PA EBÈLU CITUPÀ II

 Ndi nswà dyàmbedi kusàkidila yònsò wa kunùdi uvwa mupetè mukenji bwà “kusambidilakù mukàjàànyì.” Mmusaamè bikolè, bikolè be. Katùvwa bamanyè ne civwa ncinyi to, ne katwèna bamanyè ne cidi cyenzèke ncinyi to, òvwa ànu dilùka dikolè ne yèyè ùkaavwa ànu wa kàyi ùmanya kantu to, ne mubidi-luuyà wipacila too ne mu makùmi ànaayi ne citupà, bikaavwa bikèngela bàmulamè mujìngilà mu mbùlankètè yà mabwe a mashika. Pa nànkù. . .kàdi ùdi bìmpè mpindyewu. Mubidi-luuyà wònsò awu wùkaadi muyè, ne yèyè ùkaadi bìmpè. Kàdi ùdi ne mateketa mabi be, mujìmjè kilò bu yìnaayi ne citupà, ngeela meeji. Kènà ne. . .Dilòlò edi mmudyèku kèndè kantu kàà kumpalà kàà disùma ku mènù kacya ànu ku dyàlumingu aku. Nènku mmusaamè bikolè byà dikèma, kàdi tuvwa beeyèmene Mukalenge bwèndè yèyè, ne Yèyè wàmutùùlu ku bwalu abu. Mpindyewu tudi baswè kunwàmbila bwà nwàtùngunukakù ne kusambila bwà àpetululèku bukolè.

<sup>304</sup> Nènku mpindyewu, ndekeelu wa lumingu ulwàlwa ewu, bu Mukalenge mwà kwanyisha, bikèngela nye ku Miami. Mulunda wanyì wa kale, Mwanèètu Bosworth, ùkaadi wàlukila Kumbèlu, ne yèyè ùkaadi ne bidimu biipacila ku lukàmà mpindyewu. Nènku mmumbiikile ku tèlefonè, wàmba ne: “Mwanèètu Branham, lwà dyàkàmwè ùmmònè, ndi muswè nkwanbìleku cintu kampànda kumpalà kwà mèmè kuya.” Nènku yèyè. . .Èè, ngeela meeji ne mmuswè kunsambidila, ne kuntentekela byanza kumpalà kwà kuyayè, nudi bamanyè’s.

<sup>305</sup> Ne mèmè ndi—ndi ntèkemena ne ndikù mwà kujikija àànyì matùkù ne luumù bu lwà F.F. Bosworth. Ku bantu bònsò bándiku mumanyè pa buloba, muntu yònsò ùnkaadiku mutwilàngàne nendè pa buloba, kacya ncitukù mwanji kutwilanganakù ne muntu ùnkaadiku mujingèjìnge kufwàngana nèndè bu mùdi, bu mùdi F.F. Bosworth to; bu—bu mwambi, mùndi njinga kwamba. Kacya ncitukù mwanji kuumvwa muntu nànsha umwe, buloba bujimà, nànsha penyì, mwambèku dìyì bwà F.F. Bosworth kadiyikù ànu menemene mu byònsò ne “mmwena Kilistò” to, ne mu byònsò ne “mmwanèètu mulelèlà.”

<sup>306</sup> “Dishiyangana didi dishiya paanyimà pèètù bidyacilu byà makàsà pa nsenga yà cikondo.” Yèyè mmwanèètu mulenga wa dikèma, kàdi ùkaadi mukùlakàjì wa menemene mpindyewu, wipacila ku bidimu lukàmà. Pa nànkù ùkaadi—ùkaadi ànu wàlukila Kumbèlu, kwàjiki, ne yèyè ngwàngambidi. Òvwa

mumanyè ne ùkaavwa ùya, kàdi ùvwa ànu mwindile cyaààà. Kwambayè ne cikondo cyà citàmbe kwikala cyà kalolo cyà nsòmbelu wendè mmpindyewu mene pàdiye ànu mwindile apa, kàdi kwambayè ne ùvwa mumanyè ne ùkaavwa ùya.

<sup>307</sup> Mémè kwamba ne: “Ndi ne cyà kuya ku Michigan mu lumingu elu, Mwanèètù Bosworth.”

<sup>308</sup> Ki yêyè ne: “Èè, kùtàmbe kubinèngesha to, Mwanèètù Branham, mémè ncyèna mwà kushààla kàbìdì ntàntà mule to. Ndi ngenda ntàmbe kuteketa dībà dyònsò.”

<sup>309</sup> Pa nàнку yêyè mmutàmbe kwikala mulundà wanyì, mu mùshindù wà nciyi mwà kubènga kukùya to. Mpindyewu, byòbì bikèngela bwà nye ku ndèkè, nê—nèngàalukilè ku ndèkè ne pàmwàpa mpinganè nànsha bwà dilòlò dyà dyàlumingu; kabiyi nàнку to, èè, dībà adi nebikengelè nye ku màshinyì, ne bìdi mwà kungangata mukùngulù mule ndambù.

<sup>310</sup> Nèнку nwàsambidilaayikù Mwanèètù Bosworth. Nulombàayi ànu bwà Nzambi. . . ne pàngatàYe nkambwà mununu awu, bwà Àtumèku dikalù dyà kapyà bwà òmwambulè, nwamònu’s. Mémè ndi mumunangè, yêyè ùkaavwa kùndi ànu bu papa.

<sup>311</sup> Muntu mukwàbò mununu. . . yêyè ne Mwanèètù Seward. Ntu—ntu ànu bu udi ne cintèkantèkà bwà bantu banunu’s, ntu—ntu mubànangè. Kàdi Mwanèètù mukùlumpè Seward awu, wàkaya pèndè mu tulù mùshindù awu. Mu bushùwà bwà bwalu, Mwanèètù Seward awu, kàvwa ànu mutàmbe kukùlakaja to, ncyèna ngeela meeji nàнку to, mùdi Mwanèètù Bosworth amu.

<sup>312</sup> Nèнку nwàsambidilaayikù Mwanèètù Bosworth. Maalu ónsò kaèna malenga mu mwaba awu to, kàdi bìdi—bìdi. . . Ùdi dijinga ne masabila ènù, kàdi kabiyi menemene ànu bwà ní nciyi cyònsò to kàdi ànu bwà dyèndè. . . bwà Nzambi àmulekèlèku ùya mu ditalala.

<sup>313</sup> Mpindyewu. . . Ne pashiishe, tudi kàbìdì baswèku kuvùluka, bwà ne mààlabà, bu Mukalenge mwà kwanyisha, tudi tujjiika umwe wa ku balundà bèètù wa mu èkèleeziyà emu, Mwanèètù Sol Coates. Ùvwakù mulwàlwàlwe kaaba aka misangu yàbùngi, mwenzè mudimu ku poste munda mwà bidimu. Kàdi nyawù mufwile ku Lùpitaadi lwa Bankòlomù dilòlò dyàdya. Mémè ne Mwanèètù Cox tuvwa bayèku bwà kumòmòna, kàdi ùkaavwa. . . mufùbe yònsò. Kàdi wàlu kufwà mpindyewu, mwena Kilistò. Nèнку bikèngela bwà tùmumùshè ku Nzùbù wa Bitàlù wa Coots bwà kuya kamujiika mààlabà awu mu mapingaja pa dībà ùmwè jaajaaja, mémè ne Mwanèètù Neville. Kasumbù kàà misambu kàà bàsàtù kàà Neville nkìikalà mwà kwimba; ne netwàbanyanganè masangisha, mémè ne Mwanèètù Neville. Mbwena kwamba ne, ncìvwa mumanyè patùvwà tudyànjila kulongolola maalu apu ne nciyi menemene to, ciinè aci ànu bwà Meda. Ne pa nàнку, dībà adi, madilu èndè neenzekè mààlabà

awu mu mapingaja pa díbà ùmwè jaajaaja, ku Nzùbù wa Bitàlù wa Coots.

<sup>314</sup> Ne pashiishe, pa díbà ibìdì jaajaaja, mu diitànù, Mukalenge kampànda Wheeler. Tuvwa twétù tumubiikila ne Pod Wheeler; yéyè ki, nyewù ngápù ne mwoyi ntanyi wendè mulelèlà... Nènku, nudi bamanyè's, ndi—ndi mfùma ku dicimòna mu cibèjibeji kàdi nciyi mumanyè ne ùvwa nganyi to, too ne mûngààlù kujandula. Ùvwa mwena mutumba neetù munda mwà bidimu, kàdi—kadi nyawù wáfù's. Ùvwa ànu kaaba aka kumpàlà kwà èkèleeziyà eku, dilòòlò adi, ne mèmè mvwà nteeta bwà kumuswishisha bwà kulwakù mu èkèleeziyà. Dilòòlò adi, kùkaadi mbingu bu yisàtù nàнку, ùvwa mwimàne mwaba awu mene, ne mèmè nteeta ànu bwà kumuswishisha bwà kulwa kubwela mu èkèleeziyà. Bwalu, ncyèna ngeela meeji ne yéyè uvwà uyè mu èkèleeziyà anyi mujikùlekù diitabuuja dyà mùshindù kampànda to, kàdi pèndè's ùdi ne mwànà wa balùme mwikàle muiishi mu ba-Baptistes. Kàdi yéyè kàvwaku ne diitabuuja kampànda òvwayekù ùjikula to bwà ku dyànyì dimanya, kàdi mpindyewu nyawù wàyi bwà katwilangana ne Nzambi. Nènku aci necìkalè mu diitànù mu mapingaja pa díbà ibìdì jaajaaja ku Nzùbù wa Bitàlù wa Coots. Kàbidì, Mwanèètù Neville ne bakwàbò abu mbiikalà mwà kwimba, ku diyiisha dyà ku citalù aku kuntwaku.

<sup>315</sup> Nènku, ewu yònsò wa kunùdì udi muswè kwikala mu masangisha awu, mmààlabà pa díbà ibìdì jaajaaja, anyi, mààlabà pa díbà ùmwè. Ngeela meeji ne mmwòmò. Kí mmwòmò anyi, mwanèètù? Ne pa díbà ibìdì, anyi dikwàbò adi. Mmwòmò anyi? Pa díbà ibìdì, ku Nzùbù wa Bitàlù wa Coots.

<sup>316</sup> Nènku mpindyewu, mu dyàlumingu mu dindà...Mu diisambòmbò nekwikalè diyiisha dyà ku tudyòmbà. Nènku pàmwàpa Mwanèètù Neville neànùmanyishè, kumpàlà kwà diinè díbà adi, ànu ciikalà... ní twènza mudimu wà dyondopa bwà mu dyàlumingu dilòòlò, anyi ní ndìbà kaayi ditwàlukilà mèmè muyè ku ndèkè ku—ku Floride bwà kamòna Mwanèètù Bosworth. Ncyèna ànu mumanyè mûngààshiyanganà nendè to, yéyè nyawù mulundà munanga wa kale wa mùshindù awu. Ne pàmwàpa mbikondo byètù byà ndekeelu byà ditwilangana, byòbì ne, bu Mukalenge mwà kwanyisha, bwà pa buloba apa. Ne yéyè... Ncyèna mumanyè ní ndi mwà kumbà kushiyangana nendè dyàkàmwè anyi to; ne ncyèna muswè kushiyangana nendè to, kàdi, nudi bamanyè mùtùbì amu, pèèbè ne makwàbò maalù a dyenza.

<sup>317</sup> Mpindyewu ndi ne díyì dimwèpelè dindì muswè kwamba kaaba aka pàdìku kakùyì bantu bààbùngì apa, ne bantu bàdì balundà bàànyì.

<sup>318</sup> Ndi ne disànkà dyà kumònakù Mwanèètù wa bakàjì Smith wàwa. Musangu wà kumpàla wùmvwà mumumòne



pa cibùmbà cyà ku cyambilu eci, Nzambi àmfwilèku luse. Kàdi ndi ngeela meeji ne Nzambi neàmbwishè bangàngàbukà abu bujitu bwà cìdibo benzèle mukàji awu aci. Mémè ntu—ntu ngiitabuuja dipandangana, ntu ngiitabuuja manga a lwondòpù. Ncyà bushùwà ne, ntu mbiitabuuja. Ntu ngeela meeji ne Nzambi ngudi mubàtùme pànu bwà kutwàmbulwisha, ànu mùdiYe mutùme balongolodi bàà màshinyi a tudyèndelandelà ne bikwàbò amu. Kàdi mukàji mukesè awu, ngàngàbukà ùvwa mumushiye mulààle kwàka, mwambè ne: “Ùvwa mùle tèntè ne kànsèrè, kakwèna cìdì mwà kwenjiibwa nànsha cìmwè to.” Maamù mukesè wa musùmbà wà bànà.

323 Mémè kuyà kùdì mukàji awu, ne kuteeta bwà kuumvwiya mùdì ku disambila. . . Wa bwalu—wa bwalu yèyè ùcìdì ànu mukàji mutekète, wa bidimu biipacila ku makùmi àbìdì ne bitaanu. Ne mùshindù mwinè wùdì Nzambi mwondòpe mwanèndè mukesè wa mu dibòko awu’s, bamwinyike ne “mwànà-cishimà” ku lùpitaadi lwà bànà alu aku patùdì twakulangana apa, ku disaamà dyà nshìngù wa kabaala. Ne mu mùshindù wà wùkwàcisha bwòwà wà—wà mùvwà mwànà mukesè awu ùsanganyibwa, kàdi Mukalenge kumwondopaYè dyàkàmwè. Bòbò, bangàngàbukà abu, kabàvwakù mwà kubyùmvwa to. Mémè kuya kùdì Mándàmù Harvey, ne kwamba ne: “Mpindyewu, Mándàmù Harvey, bangàngàbukà’s bàakulekèdì’s?”

324 “Èyowà’s, mukalenge. Bìdì. . .”

325 Ki bàyèndè kwambayè ne: “Èyowà, kakùcyèna cyà dyenza to, yèyè mmùle yònsò ne kànsèrè.”

326 Mémè ne: “Èè, mpindyewu citùdì baswè kwenza, nkwiitabuuja Nzambi ne, Nzambi neò—neòndopè. . . àkondòpèku.” Ki mémè ne: “Mùshindù wùdìbi byènzeka, kànsèrè aku nkafwànyine kubènga kuumuka dyàkàmwè; kàdi twètù basambile, dìbà adi mwoyi wà kànsèrè aku newùmukè. Udi mwà kushààla mucikàle ànu usaama bwà cikondo kampànda, ne—ne” mungàakambà “udi mwà kupeta diikisha dyàkàmwè.” Ki mémè ne: “Pashìishe paanyimà pàà ndambù wa matùkù udi mwà kusaama bipite ne byà kacya kwònsò eku.” Kàdi mémè ne: “Bikèngela ùteekè diitabuuja dyèbè diikàle dilwishangana ne kànsèrè aku.” Mémè ne: “Kànsèrè aku kòkò kiikàle ne mwoyi, wèwè ngwáfwa. Kànsèrè aku kòkò kafwè, wèwè ngwìkala ne mwoyi.” Ki mémè ne: “Mpindyewu netùsambilè.”

327 Ki twètù kusambila, nènku ne cileeji cyònsò cìngàakamònà, Nzambi wàkalenga mubidi wà mukàji awu. Ki dyàkàmwè kuumvwayè bimpè, kuyayè bwà kumònanngana ne mààmù wanyì mémè, kuyayè wènda ùkùmbulangana mu nyùngulukulù mwònsò amu, (pèndè’s ùvwa mulengè dikènga ne byànza) kàciyikù ne

matàkanyika to. Ne pashiishe paanyimà pàà matukù matwè ku àsatù nàнку yêyè kubanga kusaama cyàkàbidi.

328 Ki pashiishe mêmè kufika ku dijandula ne beena mu cimenga bàvwa bambè ne bóbò “nebàfutè mfrangà yà ngàngàbukà, bu bangàngàbukà abu mwà kucipanda.”

329 Nènku mpindyewu mêmè nî ngudi mupîile, Nzambì àmfwilèku luse. Kàdi bààkangata maamù mutekète awu, kumuvwijabò “cyà diteetela mamanya” àbò awu. Kuyabò nendè kuntwaku, ne kupàtulabò mene ne mala munda mwèndè amu, ne bikwàbò byònsò. Kuumushabò byònsò mu njila wa mênýi ne mu njila wa bunyawù, ne kubifinyikabò ku nseke aku. Nènku kwenzayè mêmè citèemà ne byà mu njila pa mèèsà a dipandilangana apu. Mungàngà mukàji awu ùvwa ùlonda ne: “Bivwa ànu bu nzùbu wa cishipeelu’s, mùvwàbò bààtèeka apa bààtèeka apa byàmunda byèndè abi, ne kumwelabò ovaires ne trompes yà bindundu.” Abi mbyà ciipanshi’s, kàdi mbilelèlà. Ne mala a bindundu ne bikwàbò mùshindù awu, ne kushiyabò mukàji awu mulàadika mu mùshindù awu, maamù mukesè. Mêmè ndi ngamba, mu wànyì pàànyì mùshindù wà kucyèlela meeji ne, bangàngàbukà abu mbapîile bwà dishebeyangana.

330 Yèyè ùvwa mubàmbile, mwambè ne: “Mwanèètù Branham ùkaadi munsambidile.” Ne mwambè ne: “Netwitabuujè ne kànsèrè kèètù aku kàdi . . . ne kànsèrè aku nkafwè.”

331 Awu ne: “Mêmè ndi mupetè mapyamàpyà bwèbè wèwè ne: ‘Kànsèrè kèèbè aku kàdi ne mwoyi.’”

332 Mmunyì mùvwàyèkù mufwànyine kucimanya? Kòkò kàvwa munda, cyamù cyà mîdimà nànsha cimwè kacivwakù mwà kujandula aci to. Kànsèrè kàtu . . . Kwèna mwà kujandwila kànsèrè ku cyamù cyà mîdimà to, kòkò kiinè kàtu mmusunya, kwèna mwà kukàmòna to. Kùvwa cintu ànu cimwèpelè civwàbò benzè, nkupanda mukàji awu kàdi kumukòsolola tutùpà tutùpà. Kwàjiki. Mpindyewu bu ne civwa mmamù mukesè, mêmè mvwa mufwànyine ànu kuteeta diitabuujà dyèndè kumpàlà kwà Nzambì pamutù pàà kuvwija muntu “cyà diteetela mamanya” mùshindù awu. Mpindyewu mêmè nî—mêmè nî ngudi mupîile, nî mmêmè—nî mmêmè udi ne kalumbilà kabì, ndi muswè bwà Nzambì àmfwilèku luse, nudi numòna’s. Bwalu ncyèna muswè bwà nwènu kwela meeji ne nciitu ngiitabuujà dipandangana anyì nciitu ngiitabuujà mu bangàngàbukà ne bikwàbò abi to. Bidi ànu bimpè. Kàdi ndi ngeela meeji ne bivwa bikèngela wikalè mumanyè cyùdi wenza kumpàlà kwà kumbula mu muntu, kabiyi kukwàta nendè mudimu bu cya kuteetela dimanya mùshindù awu to. Ncyà bushùwà. Nènku mpindyewu, mu bushùwà bwà bwalu, mukàji awu kèna mwà kwikala ne mwoyi to. Kwàjiki. Bu yèyè mwà kwikala ne mwoyi, ncyà bushùwà ne neciikalè cimwè cyà ku bishimà byà bitàmbe bunène bikaadiku byenzèke kacya. Pàvwà mukàji awu

mutàngile panshì e kumòna byàmunda byèndè ku luseke, ne bikèngela twonyi twèndè twikalè tütàmbwila luseke lukwàbò, s'mmumbè kudifwila ànu mùshindù ewu, mufwè. . . Mòna's, kacivwa cintu. . . mukwàcikwètù awu's wàkafwà. Ne mwikàle ànu maamù wa bidimu bu makùmi àbìdì ne bìbìdì anyi makùmi àbìdì ne bìtaanu nàнку awu wa bwalu ne bânà bakesè bàà dikolesha bàsàtù anyi bànaayi. Cintu citàmbe kwikala cyà cyèza luse cínkaadiku muumvwè kacya bàndela's. Mémè kwamba ne: "Ku dyànyi pàanyi dyela dyà meeji pa bwalu abu, ngàngàbukà awu ngudi mupiile bwà. . ." Piikalàbi ne ùvwa mwangàte mukàji awu ànu bu cyà diteetela dimanya ne bwalu beena mu cimenga bàvwa mwà kucifucila mfrangà, dîbà adi abi mbìbì, kabivwa bikèngela kwikalaci cyanyishiibwe nànsha.

<sup>333</sup> [Muntu kampàndà ùdi ùkonka ní Nzambì ùdikù mwà kulongolola mukàji awu—Muf.] Èè, nyawù nkwambila's, mwanèètù, kî nnè kabyèna mwà kwenzeka to. Ne bìdì—kabyèna. . . Bìdì—bìdì mwà kwenzeka, ne kabìdì bifwànyìne kwenzeka. Bwalu ndi mumanyè muntu uvwa ne dibòkò dikòsèke, mu Californie (nudi bònsò munkaci mwà kucilonda mu cibèjibeji), tuvwa bamusambidile, ne *edi* dibòkò divwà dikòsèkèle *apa* adi, dikaadi ditòlòke too ne mùdì minu milwè kupàtukakù patùdì twakulangana apa; kupita lukèngìbwa, kupita ndungilu wa cyanza ne dibòko, kupita cyanza, ne bitùpà byà manungu a minu abi mbyalùkìle pa minu apu, nudi numòna's. Cìdì mu, mùndì ngeela meeji, mu *Mukòbodi wa Diitabuuja* ku ngondo yònsò. Nànsha mene pàvwàyè mutèèke byanza byèndè abi mùshindù ewu; bìvwa bìleeja mwaba wùvwà dibòkò dyèndè dikòsèkèle awu, mwaba wùvwàdì ditòlòkèle. Ku ngondo ne ku ngondo mùvwàdì dyènda dilwa, bu munda mwà cidimu cijimà nàнку.

<sup>334</sup> [Mwanèètù awu ùdi wàkula cyàkàbìdì—Muf.] Bushùwà's, ncyà bushùwà. Mémè ndi ngiitabuuja. . . N—n—ncintu cyà ku mpùùkàpùùkà, nwamònu's, ncintu cyà ku mpùùkàpùùkà menemene. Ku misangu ntu ngumvwa bàcyàmba. Mpindyewu, bwà Mwanèètù Bosworth, yèyè wàkasambidila muntu mukàji dilòlò kampànda. Ne mémè ngàkasambidila umwe mu disangisha dyànyi. Kàdì cyà Mwanèètù Bosworth cyòci cyàkènzeka dyàkàmwe; cyànyi mémè cyàkangatakù ndambù wa cikondo bwà kwenzekaci.

<sup>335</sup> Yèyè wàkasambidila mukàji kampànda. . . Mpindyewu, mvwa mubalè bujaadiki bwà mukàji awu. Ùvwa ne kànsèrè, kàyikù ne dyùlù to; kàvwa kamudyè dyùlù dyònsò. Kàdì pàakacyàbu mu dindà mukàji awu ùvwa ne dyùlù. Mpindyewu, ndi mumanyè eci. . . Mpindyewu, aci ncyà Mwanèètù Bosworth, mu mukàndà wèndè wùdì wùbìkidiibwà ne *Kilistò Mwondopi*, ngeela meeji, anyi, *Mutwàdì wa Disànka*, ewu anyi ewu. Mpindyewu, mmu bujaadiki bwà yèyè mukàji awu, ne dîna dyèndè ne mwaba wùdiye musòmbèle. Ne yèyè ùdi ne beena

mutumba ne bangàngàbukà ne bakwàbò bwà kuciijaadika ne, ncyenzèke.

336 Mpindyewu, ku Little Rock, mu Arkansas, dilòlò kampànda mu cibambalu, ngàkasambilamù. . .kí nku Little Rock to, kàdi mmu Jonesboro. Ngàkasambila. . .Mémè kwamba ne: “Nênshaalè too ne pângààsambidilà muntu wa ndekeelu.” Mvwa mwenzè matùkù mwandamukùlù a muunyà ne a bufùku pa cibumbà cyà ku cyambilu apu, nwamònu’s. Ki dîbà adi. . .ki mu cibambalu amu mukàji kampànda kuseemenayè, ùvwa mukwàte mùshwalà wèndè kuulu nùnkù ewu, kàdi mémè kudyàmbidila ne ùvwa ùdila mwadi. Ki mémè kwamba. . .Kaa, ngeela meeji ne tuvwa dîbà ìbìdì anyì isàtù wa mu dîndà, mémè kwamba ne: “Kùdidi to, mwanèètù wa bakàji, Nzambi m’Mwondopi.”

337 Yèyè ne: “Ncyèna ndila to, Mwanèètù Branham.” Kuwùmushayè; kàvwakù ne dyùlù to, nwamònu’s. Bangàngàbukà bàvwa bambè. . .Kànsèrè kàkaavwa kamudyè too ne pa mufùbà mutòòke wà munda mwèndè. . .yìvwa mimwènèke patòòke. Ki mémè kumusambidila, ne kulòmba Mukalenge bwà àmwondòpè.

338 Nènkù mu mbingu bu yìnaayi anyì yìtaanu nànkù kuumukila apu, mvwa nsanganyiibwa mu Texarkana. Nènkù kùvwa muntu mulùme mukàlàngà muvwàle bilenga musòmbe mwaba awu, kwambayè ne: “Ndikù mwà kwamba ànu dîyì cyanààna anyì, Mwanèètù Branham?”

339 Mmwenzè ànu ùbànda pa cibumbà cyà ku cyambilu apu, umwe wa baawisiyè kuteetayè bwà kumupuwisha. Mémè ne: “Èè, lekèlèbi tùmònè.”

340 Yèyè ne: “Udikù ujingulula inābànzà mutekète ewu anyì?”

341 Mémè ne: “Bwàlà, to.”

342 Inābànzà awu kwambayè ne: “Bu wèwè mwà kutàngila fòtò ewu udi mufwànyine kumuvùluka.” Muntu mulùme awu ùvwa mujikiji wa benzàvì mu—mu Texarkana, ne ùvwa mmawèndè mwikàle ne dyùlù dipyadìpyà disasè, diikàle ne mmwènèkelu ànu wa dyà kumpàla adi.

343 Mpindyewu aci cìdì cileeja ne Nzambi. . .Mémè nkààdikù mucìmònè cyenjìibwe. Mpindyewu, Nzambi ùvwa mufwànyine kwenzela Māndāmù Harvey mukesè awu nànkù. Ne ndi ndòmba bwà kucyènzaYè, bwalu mukwàcikwètù awu mmuswè kwikala ne mwoyi.

344 Mwanèètù Tony, ùvwa ne bwalu kampànda anyì?

[Mwanèètù Tony ùdì ùfila mulubù wà dyondopiibwa kampànda—Muf.] Èyo.

Amen. Amen. Èyowà, aci kàbìdì, s’ncìmpè. Èyowà, ncyà bushùwà ne Yèyè neacyènzè. Yèyè m’Mwondopi.



[Muntu mulùme mukwàbò ùdi wèla nsèkè—Muf.] Èyowà. Èyowà. Èyowà's, mwanèètù. Amen. Bushùwà's. Èyowà.

<sup>345</sup> Ndi cyà bushùwà mufwànyine. . . Mona's, ndi ntèkemena ne Nzambi ùdi ùkwalujulwilaci's, mwanàànyi wa balùme, udi mwà kwalukila naaci ne kumuleeja. Aci ncyà bushùwà menemene. Cìdi mbwà bujaadiki bwà butumbi bwà Nzambi, ndi ndòmba bwà Nzambi àcyènzèku. Kaa, Yèyè—Yèyè. . . Yèyè mwikàle Nzambi wa Bukolè bwònsò, Ùdi mwà kwenza bintu byònsò. Yèyè kàyi mwà kwenza nàнку to, bintu byònsò, Kèna Nzambi wa Bukolè bwònsò to.

<sup>346</sup> Kùdi cintu cìdi citwènzè twètù citùdi eci, mu mùshindù wutùdi ewu, bwà cyanààna nùнку tudi ne—ne mutù bu wà nyuunyi, anyi cintu kampànda cyà mùshindù awu, bu ne kakùvwakù Mutù wà meeji kampànda paanyimà pèètù bwà kwenza yònsò wa kutùdi ne kwisù kwà mùshindù kampànda, bwà kwenza mucì wà nsànga, mucì wà cilòmbàlòmbà, dibwè dyà ngaji, ne—ne kufila dishiilangana pankaci pààbi pa bìdì bitàngilà cì—cìdibi. Kàyi ùtwènzà ne. . . bàmwè biikàle ne bukuuyikuuyi, ne bàmwè ne masàlà, ne bàmwè ne bisèba, bwà nwènù. . . Nwamònu's, cìdi—cìdi m'Mutù wà meeji kampànda paanyimà pàà byòbi abi, wùdi—wùdi wùlombolà byòbi abi. Mu bushùwà bwà bwalu Yèyè mmulamè bintu byònsò mu byanza Byèndè. Ne ndi mumanyè ne Yèyè ùdi mwà kwenza bintu byònsò. Nènku netùsambilè bwà cyòci aci, netùsambilè.

<sup>347</sup> [Mwanèètù wa balùme kampànda ùdi wàkula ne Mwanèètù Branham—Muf.] Menemene. Tudi ne. . .

<sup>348</sup> [Mwanèètù wa bakàji Snyder ùdi wàmba ne: “Mwanèètù Billy, mfwilèku luse.”—Muf.] Èyowà's, mwàbàna, mbìmpè, akùlaaku. [Mwanèètù wa bakàji Snyder ùdi ùlonda mùvwàye mwondòpiibwe pàvwà Mwanèètù Branham mumusambidile mu dyàlumingu kampànda.] Amen. Udi mumanyè's, mvwa nteeta kwela meeji's, Mwanèètù wa bakàji Snyder, musangu kampànda wùmvwà mwimàne kaaba aka mu dilaabiibwa adi, mvwa ndyàmbidila. . . Mémè kwambila Mwanèètù Cox, mémè ne: “Ncyàkuteeta nànsha kàbìdì kwenza masangisha a dijingulula awu ku tabernacle kwàka to.” Kaa, kwèna mumanyè mùdi démon awu ùntàcisha to, mwanèètù wa bakàji. Mùshindù—mùshindù mwinè wùdiye ùcyènza's wè! Nudi bamanyè's, ùngambila bwà majingulula aa's.

<sup>349</sup> Kàdi mònaayi, kwenzekabi ne njandulè ne mwanààbò ne Màndàmù Wood wa bakàji kaaba aka. . . Kacya ncìvwakù mwanji kumòna nànsha umwe wa ku beena fàmiyè wabò to. Musumbà mujimà wà kùdìbo bààkondopiibwa mu ciinè cikondo aci, biinè abu muntu ne muntu. . . Mòna's, nudi bamanyè's, ncitùpà cinènè pa lukàmà cyà bantu abu cyàkondopiibwà. Nènku paanyimà pàà. . . Cintu cyà pabwàci mpindyewu: mwanààbò wa bakàji awu, ngàkadyàku nendè didyà dyà dilòlò

mu dilòlò kampànda, mbingu bu yibìdì nàнку kumpàlà kwà cyôci aci, . . . Kaa, ndwà ku mikùnà kwàka mu Kentucky, ne mêmè—mêmè ndi ànu mumanyè ne yêyè ùvwa ne díyì bu dyà Mándàmù Wood, ne kakùvwa bukênkè bwábúngì menemene mu cibambalu amu to. Ne byôbi biine ncìvwakù mutùme ntèmà kùdiye to, mvwa, mvwa ntàmba kwakula ne bàyendè, yêyè ùvwa ùlongolola didyà dyà dilòlò. Ki twètù kupàtuka kuya kasòmba ne twètù kudyà; ki twètù kwalukilamù, mêmè mvwa ngaakula ne bàyendè, kujuuka e kupàtuka kuya pambèlu. Ne Nzambi Udi Mulumbulwishi wanyì wa kàyì tuseku awu mmumanyè ne (mwimàne ku cyambilu eku) ncyàkajingululakù mukàjì awu to.

<sup>350</sup> Ki díbà adi paanyimà pàà mudimu wà dyondopa mumanè kujika, mêmè kwenza dibìikila dyà ku cyoshelu bwà bangènzàmpèkààtù kunyingalalabò. Wa bwalu mukàjì awu ùvwa mwelè mukana be ùCibènga; kàdi kunyingalalayè ne kufilayè mwoyi wèndè kùdì Kilistò, kwelayè cyanza muulu ne ùvwa mwà kulekeleela Kilistò mwoyi wèndè, ne mwikàle ùdila mwadi. Paanyimà pàà dilaabiibwa dyònsò dimanè kuumuka's, mêmè munkaci mwà kwenza dibìikila dyànyì dyà ku cyoshelu, ne bikwàbò. Ki pashìishe kwenzakabì ne nkudimukè, kàdi ki cikèènà-kumòna eci pwà, ne mêmè kumòna mwanààbò wa balùme; bwalu yêyè ùvwa mwanèètù wa bakàjì, ewu ùvwa mmwanààbò wa bakàjì, ne bònsò pàmwè.

<sup>351</sup> Ki mêmè kudyàmbidila ne ùvwa mmukàjì wa Charlie, bwalu mvwa mumanyè ne pàmvwà musòmbè ku mèèsà ditùkù adi apu, kwà—kwà Charlie kwàka. . . Mukàjèndè mukesè awu, kakwàcìkwètù kakesè menemene aku, Mukalenge wàkandeeja lutàtù lùvwàye mupetè. Ki kubangila pa dyòdì díbà adi, Mukalenge kulengaYè mubidi wèndè, musòmbè mwaba awu ku mèèsà èndè awu aku mpindyewu. Tony, mwaba wutùvwà awu, kuntwaku, bayè mu kulemba kwà nshindì. Ki Mukalenge kulengaYè mubidi wèndè ne kuumushaYè cintu cìvwà cikèngela kwikalayè muvwàle eci. . . matùkù èndè ònsò a mwoyi, kuumumushaci pambidi; musòmbè ànu mwaba awu. Pèndè mukàjì mukesè awu ùvwa misangu yònsò ànu ùdiila lwà ku luseke lukwàbò lwà mèèsà, kàdi leelù, ùseemena buludì, ne ùseemeja nkwasà wèndè, ne ùdiila ànu ku luseke lwànyì aku. Kàvwakù mumanyè cìvwàye wènza aci to. Bàyendè musòmbè mùshindù *ewu*, ne Mwanèètù Banks musòmbè mwaba awu, ne twètù munkaci mwà kuyiikila. Nènku kusemenayè, ne kwangatayè nkwasà wèndè, kumutèkelayè lwà ku luseke lwànyì eku. Ne cìvwa mmu kiipàcilà kampànda, Mukalenge kuleejaYè cikèènà-kumòna ànu mwaba awu mene. Ki mêmè kubiikidila bàyendè pambèlu apu, bwalu cìvwa ndisaamà dyà bânà bakàjì, ki mêmè kubanga kumulondela cìvwà cyenzèke aci. Kwambayè ne: “Mwanèètù Branham, s'ki mùshindù wùvwàci cyenzèke menemene, ànu nàнку menemene.” Nènku mwaba awu kwambilayè mukajèndè awu, ne Mukalenge kumwondopaYè.

Èyo.

<sup>352</sup> Nènku pashiishe paanyimà pàà disangisha dimanè kujika dilòòlò adi, ki mukwàbò mwanèètù wa bakàji ewu, mémè kumòna Charles wa mutekète ewu ne mukàji mutekète ewu biikàle pàmwè. Mémè kudyàmbidila ne: “Wàwa ùdi ne cyà kwikala mukàjèndè; kàdi mukàjèndè yèyè ùtu wa nsùki mitòòkòlòke, kàdi ewu mmukàji wa nsuki mifiike.” Ki kwenzekabi ne mmonè cikèènà-kumòna citentemukila lwà mu ditumba emu. Ne yèyè ùvwa musòmbe mwaba awu ùdikùpula mwìsù ne Mukalenge kuleeja Yè cikèènà-kumòna paanyimà pàà yèyè mumanè kwikala . . . dibìikila dyà ku cyoshelu . . . paanyimà pàà disangisha dyà milòmbo dimanè kujika, dyondopa dyà babèedi, ne dibìikila dyà ku cyoshelu dimanè kwenjii bwa, ki Nzambi kwindila Yè too ne pàakanyingalalàye ne kufilayè mwoyi wèndè kùdi Ye ne pashiishe kukùdimuka e kumwondopa Yè. Nènku mmupetè . . . ntàtù yèndè yivwa mimuuje mubidi munda mwà bidimu. Nènku mmulwè kukèepela bikolè, ne bikwàbò byònsò, mu mùshindù wà ne nànsha mene makàsà èndè àkeela ne minyèngù myaba yivwà byònsò abi bimumùke (milùngù ayi) mu mubidi. Ukaadi ùdyùm vwa bìmpè kutàmba mùkaadiyekù mudyùm vwe munda mwà bidimu, nwamònu’s. Ne mùshindù mwinè wùdi Mukalenge ku ngàsà Wèndè udi ukèmesha awu wènza ciinè aci’s wè! Ngeela meeji ne ki mùvwà bwalu abu; kì mmwòmò anyì, Mwanèètù wa bakàji Wood? Ne mùshindù mwinè wùdi Ye wènza’s wè! Paanyimà . . . Wamba bìshi? [Mwanèètù wa bakàji Wood ùdi wàmba ne: “Mmujiimije bujitu bwà kilò yisàtù lumingu lwàshàadi elu.”—Muf.] Kilò yisàtù mu lumingu lùmwe. Kaa, Yèyè ùdi Nzambi, kì mmwòmò anyì?

<sup>353</sup> Mpindyewu, nènnwàmbilè, cìmvwà mwambidile Mwanèètù Neville . . . Mvwa ndyàmbidila ne yèyè pàmwàpa ùvwa ne diyiiisha bwà dilòòlò edi. Kwambayè ne: “Bwàlà,” kàvwa naadi to. Kàdi mémè ndi ne ndambù wa nkonko mwab’ewu yivwà mishàale, mvwa mudyùm vwe mwenzèjii bwe bwà pa bìdi bitàngila nsòmbelu mulenga bwà ndwe mwab’ewu bwà kwandamuna ku nkonko eyi. Pashiishe ndi ne mikwàbò yibidi anyì yisàtù yingìikalà ncìyi pàmwàpa mwà kufika ku yòyi dilòòlò edi to.

<sup>354</sup> Ndi muswè kunùleeja yimwè yà kùdiyi mbafùme ku diyifila kùdi muiiishi kampànda. Mwanèètù Neville ngwafùmu, anyì, Beeler ngwafùmu ku diyintwàdila. [Mwanèètù Branham ùdi wàndamuna ku nkonko mwandamukùlù yidi yilondà eyi mu Citùpà III, bu nkonko yà nombà 67 too ne ku 74—Muf.]

**Mabwe awu àdi àleeja cinyi mu Bwàkabuulwibwà 21.19 ne 20?**

**Umvwijàku nyama yinaayi yà mu Bwàkabuulwibwà 5 . . .**  
Mmuswè kwamba 6; kì m’Bwàkabuulwibwà 5 to, nyì6, ngeela meeji.

**Ne bakùlù makùmi àbìdì ne bànaayi mbanganyi?**

**Mwonji mukünze wà mu Genèsè 38 awu wùvwa wùmvwija cinyi?**

**Nkwèpi kùdì kùkèngelà kutùma mapà pa bìdì bitàngilà lufù lwà bantèmù bàbìdì abu, mu Bwàkabuulwibwà 11?**

**Bansantu nebiikalè penyì paanyimà pàà bukòòkeshi bwà bidimu cinunu? Ne mmubidi wà mushindù kaayi wikalàbo naawù?**

**Mmunyi mutwàlumbulwishà banjèlo?**

**Nsuki yidi yilwa cinyi bwà banjèlo bàà mu Kolintò wa Kumpàla?**

<sup>355</sup> Nwènu bàdì bamba bwà yà mimpè's, s'ki yà mimpè nyôyi ayi. Pàmwàpa ncyàkufika ku yôyi ayi dilòòlò edi to, kàdi bu Mukalenge mwà kwanyisha, nènteetè bwà kuyàngata musangu wàlondà wutwàlwà bwà cyôci aci.

<sup>356</sup> Ndi ne yà mimpè menemene kaaba aka dilòòlò edi; pa nanku netùsambilè ànu cyanàànà mpindyewu bwà kulòmba Mukalenge bwà kutùkwàcisha, ne netùbwelemu buludì munda mwà tusunsa, kàà, makùmi àsàtù, anyi makùmi ànaayi tùdì tùlondà etu.

<sup>357</sup> Mpindyewu, Taatù wa mu Dyulu mubènèshìibwe, tudi ne kusàkidila Kùdì bwà byònsò biWàtwènzèdì. Nènku, kaa, bìdì bikemesha be mùdì ngàsà Webè ùpweka too ne kutùdì. Ndi ngeela meeji mpindyewu, ku dilòòlò adi, mwena dyànyì mukèsè awu, kaa, ùsaama bikolè, ne Wèwè kubwela mu cyalu. Mubidi luuya wèndè kubangawù kupweka kubangila ànu pa dîbà adi mene, ne mmujikè ànu wònsò mpindyewu. Ndi nKwela twasàkidila. Nènku. . . ndi ànu ndòmba bwà Wikalèku ne muntu yònsò udi mufilè dilòmba dilòòlò edi. Ne tudi tumanya ànu kakesè, pàdì bwalu kabùyi butùkwàte twètù mu nzùbù mwètù to, cìdici cyùmvwija, kaadisambila kakesè. Éyi Nzambì, cìdì. . . mùshindù mwinè—mùshindù mwinè w'Udì ulwa wa cyà bushùwà's wè. Mu dîbà dyàdisàkà ngàngàbukà kule adi, wamba ne: "Ncyèna mumanyè to, kàcya ncutukù mwanji kumòna cintu cyèna bu eci to," ne dîbà adi Mukalenge Yesù ùmba ùmata mu cyalu.

<sup>358</sup> Éyi Nzambi wa yààyà, Wèwè's udi wa cyà bushùwà kutùdì, ne twètù tudi ne disànka dîngì bwà bwalu abu. Tudi tulòmba bwà Ùtùfwilèku luse ku ngiikàdìlù yètù yà lulèngù, ne ngiikàdìlù yètù yà mikùtākàne ayi. Nènku, kaa, watùvulukakù, Mukalenge, ne tudi mubidi wa buntu mu buloba bùdì mìdimà, buloba bwa mifitù ne mpèkaatù ne cimvundù cinène. Ne tudi tutàngidila mu cibwikilu kampànda, mutùdì mwà kwamba's, pa mpàlà yètù, ne tudi tumòna ne tumanya ànu mu buntu pànwapa. Kàdi dîngà ditùkù pùmuishìibwà cibwikilu aci, netùKumònè mpàla ne

mpàla ne netùmanyè mutùdi bamanyìbwe. Adi ki ditùkù ditùdi tujinga ne mwoyi mujimà.

<sup>359</sup> Tudi tulomba Taatù, mpindyewu, bwà Ùtùkwàcishèku patùdi tuteeta bwà kupèèsha bantu Dìyi dyà Nzambi apa, bilondèshile malòmbà àbò. Tùmùshèku bubèèdi bwònsò. Tudi Neebè dijinga, Mukalenge. Nènku tudi tulòmbakù bwà Watwènzelaçi. Luse Lwèbè lùtùpèèbwèku, bwalu tudi tulòmba nùnkù mu Dìnà dyà Yesù. Amen.

<sup>360</sup> Mpindyewu, mu dyandamuna dyà nkonko, mèmè ncyèna udi mutàmbe bwimpè mu ditùnga to, nudi bamanyè's. Kàdi nèngàdamunè ànu ku dyànyì pàànyì dimanya.

<sup>361</sup> Lùmvwà mubangè naalù dilòlò adi ndwòlò elu, kàdi kukèngelabi bwà mèmè kwimanyika:

**60. “Ku Nyumà umwe nkutùdi bònsò babàtìjìbwe mu mubidi wà Kilistò.”** (S'nudi bònsò bavùlùke ne pa lukonko alu ki pàmvwà nsanganyìbwa. Mpindyewu aci cidi cisanganyìbwa, mu bushùwà bwà bwalu, mu Kolintò wa Kumpàla 12)...**Pa dìbà ditùdi...tupeta dilediibwa dipyadìpyà, eci ncìdi cyènzekà. Ng'eci...Eci ki Dibàtiiza dyà Nyumà Mwìmpè anyì, anyì kùdi dibàtiiza dilwalwà pashìshe, anyì ndyujìbwa?**

<sup>362</sup> Mpindyewu, alu s'ndukonko ànu lwà menemene, ne tudi bafwànyìne kupicishila dìbà dyètù dyònsò didi dishààla ànu pa lwòlò alu, bwà dilòlò edi ne màalabà dilòlò ne bikwàbò. Ndufwànyìne kwangata...ndufwànyìne—ndufwànyìne kwangata ne kuswikakaja Bible mujimà. Mufundu wònsò wùdi ne cyà kuswikakana mu mùshindù mukùmbànàngàne ne mukwàbò Mufundu mu Bible.

<sup>363</sup> Kàdi ànu bwà kuteetakù kuçìvwija mu cikòsò, citòòke tòò mùndi pàànyì mumanyè mwà kucyènza amu, to; paùdi witabuuja Mukalenge Yesù Kilistò, dìbà adi udi upeta dilediibwa dipyadìpyà. Paùdi witabuuja Mukalenge, udi upeta meeji mapyamàpyà, mwoyi mupyamùpyà, kàdi kí n'Dibàtiiza dyà Nyumà Mwìmpè nànsha. Nwamònu anyì? Udi upeta dilediibwa dipyadìpyà paùdi witabuuja, udi upeta Mwoyi wa Cyendèlèlèlè. Ndià dyà Nzambi didi dikupèèsha ku ngàsà mudishikàmìne ku diitaba dyà dipà didi Nzambi ùkupèèsha. “Ewu—ewu udi umvwa Méyi Àànyì ne witabuuja Yèyè udi muNtùme, ùdi ne Mwoyi wà Cyendèlèlèlè.” Udi ne Mwoyi wà kashidi; ki dilediibwa dipyadìpyà ndyòdi adi, udi mukùdimùne mucima, mbwena kwamba ne udi “mukùdimùke.”

<sup>364</sup> Kàdi Dibàtiiza dyà Nyumà Mwìmpè didi dikubweja mu mubidi wà Kilistò, mwikàle ukòòkela mapà bwà mudimu. Kacyèna cìkuvwija mutàmbe kwikala mwena Kilistò to, cidi cìkubweja ànu mu mubidi wà mapà cyanàànà. Nwamònu anyì? “Mpindyewu, ku Nyumà umwe” (Kolintò wa Kumpàla 12) “nkutùdi bònsò babàtìjìbwe mu mubidi wùmwe. Mpindyewu,”

mùdi Pòlò wàmba, “kùdi mapà mashiilàngàne, ne mu mubidi ewu mùdi mapà citèema a Nyumà.” Nènku mu mubidi ewu... Bìdi bikèngela ùbatiijiibwè mu mubidi bwà wèwè kwikala ne òmòwè dyà ku mapà aa. Àdi àlwa pàmwè ne mubidi.

<sup>365</sup> Kàdi, mpindyewu, bwà bìdi bitàngilà kwikala ne Mwoyi wa Cyendèlèlè ne kwikala mwena Kilistò, udi mwena Kilistò dìbà dyùdi witabuuja adi. Mpindyewu, aci kí nkwitabuuja byà budingibudingi to, nkwitabuuja Mukalenge Yesù mu bulelèlè ne kuMwitaba bu Musùngidi webè sungasunga; udi ulediibwa cyàkàbìdi mwaba awu mene, ne udi ne Mwoyi wà Cyendèlèlè. Nzambi ùdi ùbwela munda mwèbè.

<sup>366</sup> Mpindyewu tàngilàayi, Mwoyi wa Cyendèlèlè; Yesù wàkamba ne: “Ewu udi umvwa Méyi Àanyi ne witabuuja Yèyè udi muNtùme, ùdi ne Mwoyi wà Cyendèlèlè, ne kàakupicila ku cilumbulwidi to kàdi wàmanyi kuumuka ku lufù wàyi ku Mwoyi.” Udi cifùkiibwà cipyacipyà ànu apu. Pashiishe Pòlò wàkatuutakeena ne bàmwè bàà ku bantu abu, mu Byenzedi 19. Bàvwa ne muyiishi kuntwaku uvwa mwakwidyanganyi mukùdimùne mucìma dìnà dyèndè Apòlò. Ne Apòlò ùvwa muntu wa bukolè mu Mifùndu, ne ùvwa ùjaadikilangana ku Mifùndu ne Yesù ùvwa Kilistò. Nwamònu anyi?

<sup>367</sup> Mpindyewu tàngilàayi. Apòlò, ku Dìyi, ùvwa ùjaadikilangana ku Dìyi. “Dii tabuuja dìdì difùma ku dyumvwa, dyumvwa dyà Dìyi. Ewu udi umvwa Dìyi Dyanyi, ne witabuuja Yèyè udi muNtùme, ùdi ne mwoyi wà kashidi.” Nwacyùmvù anyi? Apòlò, ku Dìyi, ùvwa ùjaadikilangana. Ne bòbò aba bàvwa beena Kilistò, bàvwa balondi, bayiidi. Ne Apòlò ùvwa ùjaadikilangana ku Dìyi ne, Yesù ùvwa Kilistò. Ne bàvwa ne disànka dinène ne bààkaakidila Dìyi, cibi biikàle bamanyè ànu dibàtiiza dyà Yone.

<sup>368</sup> Kàdi pàvwà Pòlò upicila ku nseke mitùmbùkè yà Efèsò, kusanganayè bayiidi aba ne kwambayè ne: “Nukàadi bapete Nyumà Mwimpè *kacya* nwítabuuja anyi?” Nwamònu anyi?

<sup>369</sup> Mpindyewu, paùdi witabuuja, Yesù wàkamba ne: “Udi ne Mwoyi wà Cyendèlèlè.” Ki dilediibwa dipyadipyà ndyòdi adi. Ki dikudimuna dyèbè dyà mucìma ndyòdi adi, dishintuluka. Kàdi Dibàtiiza dyà Nyumà Mwimpè mbukolè bwà Nzambi mùdi mubàtiijiibwemù ne ukòkela mapà a Nyumà citèemà aa bwà kukwàtawù mudimu munda mwèbè; bu mùdi: kuyiisha, batangadiki, bapostòlò, bampaasàtà, bapròfetà, . . . ne mapà ònsò a mubidi àdi àbwela mu wòwò aa, paùdi ubàtiijiibwa mu mubidi ewu. Nenku aci cidi. . . kacyèna cikuvwija mutàmbe kwikala mwena Kilistò to, cidi ànu cikutèeka bilondèshile myaba mu mwaba kampàndà bwà kwikala nyumà mukwàcishi mu Èkèleeziyà wa Nzambi udi ne mwoyi. Mpindyewu nwacyùmvù anyi? Nwamònu anyi?

<sup>370</sup> Mpindyewu lukonko lùdi ne. . . Tùyàndàmùnaayi ànu ku lùmwè ku lùmwè, kùdi nkonko yisàtù.

**“Ku Nyuma umwe nkutùdi bônso babàtìjìibwe mu mubidi wà Kilistò.”**

Aci mmu cyôci, Kolintò wa Kumpàla 12 ngwafila dyandamuna ku cyôci aci. Èyo.

**Pa dibà ditùdi tupeta dilediibwa dipyadipyà adi apu, ki pàdi cyôci eci cyènzeka anyi? Aci ndibà kaayi?**

371 Ki cìdìbo baswè kumanya ncyôci aci, èyowà... “Ku Nyumà umwe...” To. To. “Ku Nyuma umwe nkutùdi bônso babàtìjìibwe mu mubidi wùmwe.” Nwamonu’s, apu kî mpàdi dilediibwa dipyadipyà dibanga to, dilediibwa dipyadipyà didi dibanga paùdi *witabuuja* Mukalenge Yesù.

372 Mpindyewu nwamònu’s, kakwènakù...kakwènakù cintu nànsha cimwè...Mpindyewu tèelejàayi. Cyùdi mwà kwenza pa kuumusha kwitabuuja ncinyi? Ncinyi cikwàbò cyùdi mwà kwenza? Ncinyi cikwàbò cyùdi mwà kwenza pa kuumusha ànu kuciitabuuja cyanaàna? Ngambilèbi tũng cintu cimwèpelè cyùdiku wèwè mufwányine kwenza. Kakwèna cintu nànsha cimwè cyùdiku wèwè mwà kwenza pa kuumusha kuCìitabuuja to. Mpindyewu, cintu nànsha cimwè cilwè pambèlù pàa kwitabuuja kwèbè, kî ncintu cyà wèwè mudyènzèle to, ncyenzedi cyà kùdi Nzambi. Ki bwà cinyi... .

373 Mpindyewu bu twètù mwà kwamba ne paùdi... Misangu yàbúngì nkàadi mumòne, misangu yàbúngì, bantu biitabuuja “cileeji cyà mbilangulu cyà dyakula dyà mu myakulu” bu ne ki Nyumà Mwìmpè. Ne mîngà misangu banyúkusha bantu, anyi bábàtuuta bintu ne bábàtuuta tuumapi, bàmba ne: “Cyámbe. Cyámbe. Cyámbe. Cyámbe.” Nudi bamanyè’s, bàmba mwakù bàwàmbulula. “Cyámbe Cyámbe. Cyámbe.” Nwamònu’s, aci ncintu cyùdi udyènzela. Ne—ne—ne kaciyi...kaciyi... kaciyi—kaciyi cintu nànsha cimwè to. Udi mufwányine kupeta dibwejakaja dyà myakulu. Udi mufwányine kupeta bi—bintu búngì cyanaàna, ne masaluka. Kàdi cintu cyôci cilwè pambèlù pàa diitabuuja dyèbè sungasunga, cidi ne cyà kwikala dipà dyà kùdi Nzambi dikupèsha. Nwamònu anyi?

374 “Ne ku Nyumà umwe nkutùdi bônso babàtìjìibwe mu mubidi wùmwe.” Aci mmwòmò, nwamònu’s. Dibàtiiza dyà Nyumà Mwìmpè ncyenzedi cishiilàngàne ne dilediibwa dipyadipyà. Cimwè ndilediibwa, cikwàbò ndibàtiiza. Cimwè cidi cikutwàdila Mwoyi wà Cyendèlèlè, cikwàbò ìdi cikupèsha bukolè. Didi difila bukolè mu Mwoyi wà Cyendèlèlè, nwamònu’s, bwà kukwàta mudimu. Mpindyewu nwacyùmùvù anyi? Mbìmpè. Èyo.

375 Mpindyewu lukwàbò ndwòlò elu, lulwè lwibìdi, lwà lutàmbe bwìmpè ku yìmvwà mupetè dilòlò adi ayi:

**61. Nyumà wa Yesù ùvwa penyì matùkù àsàtù àvwà Mubidi Wèndè wùsanganyiibwa mu lukità awu? Nyumà Wèndè ùvwa penyì?**

<sup>376</sup> Mpindyewu, Nyumà Wendè, bu nwênù mwà kulonda Mifundu, . . . èè, tudi bafwànyine kutwàla myaba yàbúngi. Kàdi, ndi ndìkonka's, nganyi udikù ne Bible? Mwanèètù Stricker, udikù ne Bible anyi? Èyo. Mwanèètù Neville, udikù ne mukwàbò anyi? Mpetèlèku Misambu 16.10. Ne mukwàbò nganyi? Mwanèètù wa bakàjì Wood, udikù ne Bible mwaba awu anyi? Èè, Mwanèètù Stricker, (èyo, ewu anyi ewu), mpetèlaayikù Byenzedi 2.27, Byenzedi 2.27.

<sup>377</sup> Nènku mpindyewu, cyà kumpàla, pàakafwà Yesù. . . Paùdi ufwà, mubidi wèbè ngùdi wùfwa. Mwaku *lufu* wùdi wùmvwija ne “kutàpuluka,” ànu kutàpuluka ne bananga bèbèbè cyanààna. Kàdi apa Yèyè mmwambè nùnkù, mu Yone Munsantu, nshapità wa 11: “Ewu udi umvwa. . .” To . . . Mfwilaayikù luse; amu mmu Yone Munsantu 5.24 ne: “Ewu udi umvwa Mèyì Ànyì ùdi ne Mwoyi wà Cyendèlèlèlè.”

<sup>378</sup> Yesù wàkambila Martà, uvwa mulwè bwa kutuutakeena Nendè awu, . . . Yèyè ne: “Bu ne Uvwa mwaba ewu, nùnkù mwanèètù wa balùme kí mmufwè to. Kàdi nànsha mpindyewu, cyònsò cy'Ùdi ulòmbà Nzambì aci, Nzambì neàKupèèshèci.”

<sup>379</sup> Yèyè ne: “Mémè ndi Dibìikà dyà ku lufù ne Mwoyi.” Nwamònu anyi? “Ewu udi ungiitabuuja Mémè, nànsha byòbì ne mmufwè, kàdi neikalè ne mwoyi; Ne ewu yònsò udi ne mwoyi ne ùngiitabuuja Mémè, kàadyàkufwàku to.”

<sup>380</sup> Mpindyewu—mpindyewu, kùdi citùpà cyà ku twètù cidi kaciyi cifwa to. Nènku bu mungàfùmu ku dileeja mulongolongo mujimà wà Mifundu, cyònsò cidi ne ntwàdijilu cidi ne ndekeelu. Bintu bidì kabìyi ne ntwàdijilu abi, mbidì kabìyi ne ndekeelu. Kì bwà cinyì patùdi twitaba Kilistò, Nzambì, tudi tulwa bàna bàà balùme ne bàà bakàjì bàà Nzambì, ne Mwoyi wètù kawèna ne ndekeelu to ànu mùdi Mwoyi wà Nzambì kawùyì ne ndekeelu amu; tudi ne wà Cyendèlèlèlè.

<sup>381</sup> Mpindyewu, mwakù *kashidi*, tudi bawùkenkète. Mwakù *kashidi* wùdi “ncipòlò cyà cikondo,” *kashidi ne* (mutwàngaji) *kashidi*. Ne tudi basangàne kaaba aka ne cidi ne—cidi ne ndekeelu, ànu mùdi makènga ònsò aa, ne bubèedi bwònsò, ne tunynganyinga twònsò, ne dinyookiibwa dyònsò, ne ifèrnò yèyè mwinè ùdi ne ndekeelu.

<sup>382</sup> Kàdi Mwoyi wa Cyendèlèlèlè kawèna ne ndekeelu to, bwalu kaWùvwa ne ntwàdijilu to. KaWènakù mwà kufwà to bwalu kaWùtukù mulediibwe to. KaWùvwakù ne ntwàdijilu wa matùkù to, kaWènakù ne ndekeelu wa cikondo to. Mpindyewu, mùshindù wùmwèpelè wutùdiku mwà kwikala ne mwoyi Cyendèlèlèlè, mmu kupeta kwà cintu kampàndà cidi cyà Cyendèlèlèlè. Ne Nzambì ùvwakù; kumpàla kwà kwikalakù cintu kanà cyònsò eci, cìvwa n'Nzambì. Kacya Nzambì kàvwakù ne ntwàdijilu anyi ne ndekeelu to.



383 Ne Nzambi ùvwa Nyumà munène ewu. TwâMufwànyikiji ne—ne meekala mwandamutekètè a mwanzankòngòlò udi ubwikila. . . Citùpà cyà cijèngù aci mu bushùwà bwà bwalu cìvwa cìfwànyìne kubwikila buloba bu ne kacìvwa cilengè buloba to. Cìdi ànu mmâyi mu cijèngù cyà mfùdiilu wa buloba, ôwò ngàdi àcyèenza. Kàdi, mpindyewu, bu mùdi Nzambi wa Cyendèlèlèlè, ne Yèyè ùvwa Mupwàngàne awu: dinanga dipwàngàne, ditalala dipwàngàne, disànka dipwàngàne, disànkishiibwa dipwàngàne. Nyumà yònsò mwandamutekète ayi (mutùdi tuyìpeta mu Bwàkabuulwibwà amu), yàkapàtuka; yàkènjiibwa Nzambi, yìvwa bupwàngàne. Cintu cikwàbò cyònsò pambèlù pàà cyòcì aci cìvwa ncintu cìvwa cinyangàkàjìibwe kuumukila ku Aci.

384 Mpindyewu mùshindù wùmwèpelè wutùdiku mwà kwalukila ku bupwàngàne, ngwà kwalukila ne Cyòcì aci (bupwàngàne, bùdi Nzambi abu). Pashiishe tudi tulwa ku bupwàngàne, dìbà adi tudi ne Mwoyi wà Cyendèlèlèlè; katùyì ne ndekeelu, anyi katùyì—katùyì ne cintu nànsha cimwè to, cìdi ànu Mwoyi wà Cyendèlèlèlè bwà kashidi.

385 Mpindyewu yèyè ùdi wàkula bwà musùkà. . . nyumà. Bwalu tudi twambula mibidi yètù tuya naayi ku lukità lwà udi mutàmbe bunsantu wa kutùdi awu, bwà mubidi ewu. Nènku mubidi. . . Ku ntwàdijilu, pàvwà Nzambi, Logos wàkapàtuka mu Nzambi awu. . .

386 Anyì, mungăcikenkèci, Kătòlikè ùdi ùCibiiikila ne, “buumwàna wa Nzambi bwà Cyendèlèlèlè.” Pààbi, mungămbi kumpàla amu, mwakù awu kawèna mene wùmvwika wà meeji to. Nwamònu’s, kakwèna mwà kwikala mwànà wa Cyendèlèlèlè to, bwalu bìvwa bikèngela bwà mwànà kwikalayè ne ntwàdijilu. Ne pa nàнку Yesù ùvwa ne ntwàdijilu, Nzambi kàvwa ne ntwàdijilu to. Nwamònu anyi? Kàdi Mwànà ùvwa. . . kàvwa buumwànà bwà Cyendèlèlèlè to, kàdi Mwànà ùvwa ne Taatù ku cibangidilu awu ùvwa n’Logos wàkapàtuka munda mwà Nzambi awu.

387 Nènku ùvwa n’tèòfàní wa Nzambi wàkapàtuka awu. Mmwènkelu wa buntu uvwa kàyi ne mèsù munùdi numòna amu to; dísù ditàmbe bwìmpè. Kàvwa ne macì munùdi nuumvwa emu to, kàdi dyumvwa ditàmbe kule ne kule. Nwamònu’s, Ùvwa n’tèòfàní, mu mùshindù wà ne, mwanzankòngòlò wònsò ewu wàkenza bu udi mupwekè milongo mubwelè mu—mu tèòfàní. Mòsà wàkaCimòna pààkapìcilàCì lwà pa lubwebwe mùshindù ewu. Wàkamòna bitùpà byà paanyimà, yèyè kwamba ne: “Cìvwa cìfwànàngàne ne muntu.”

388 Abraham wàkaMumòna pàvwàYe mutùùlùke mubwelè mu mubidi wà buntu ne mudyè munyìinyi wà kànà kàà ngombe, munwè mabèèle, mudyè màntekà. Abraham wàkaMumòna pàcìvwàYe ànu ùcifuminakù ku dibwelamù, ne pashiishe

kuumukamù e kujìmina buludì. Twásanganyì ne mibidi yètù mmyenza ne bintu dikùmi ne bisambòmbò byà ku buloba, byàkasangishiibwa ànu pàmwè cyanààna. Nènku Nzambì wàkabisanga pàmwè, ne kwela Banjèlò bàbìdì mu mibidi ayi; Banjèlò bààkiimanà ne kwakula. Ne Banjèlò bàvwa bantu cikondo. . . mu ciinè cikondo aci.

<sup>389</sup> Mpindyewu mònaayi, tudi tusangana ne, Melekisedekè ùvwa Nganyì pa kuumusha Nzambì Yèyè mwinè! Kacivwakù mwà kwikala mungà muntu nànsha umwe to, bwalu Ùvwa Mfùmù wa Salèmà udi Yèlusàlèmà. Kàvwa nì nnè taatù anyi ne maamù to; kàvwa mwà kwikala Yesù to, bwalu Yèyè ùvwa ne taatù ne maamù. Kàvwa ne ntwàdijilu wa matùkù, ne ndekeelu wa mwoyi nànsha; kùdì ànu Umwèpelè udi ne aci, n'Nzambì. Ùvwa n'Nzambì musòmbèlè pànwapa mu tèòfànì. Nwamònu anyi? Mònaayi, Mfùmù wa Salèmà.

<sup>390</sup> Mpindyewu, Nzambì wàkiikalakù ne mwoyi munda mwà cikondo, mu bantu Bèndè. Ùvwa n'Nzambì uvwa mu Davidì, uvwa mumutèèke pa mukùnà, ne bu mfùmù mubèngùibwe, ne kudilayè mwadi. Nyumà umwèumwè awu wàkamwèneshiibwa mu Yesù Mwànà wa Davidì, Wàkabèngiibwa mu Yèlusàlèmà ne wàkadila mwadi awu.

<sup>391</sup> Yòzefù, musùmbisha ku bìnjànjà byà mfrangà makùmi àsàtù, mukina kùdì mwanààbò wa balùme, munanga kùdì tatwèndè, wàkashikikiibwa ku dyàbalùmè dyà Pàlò, ne muntu nànsha umwe kàyikù mwà kulwa to pa kuumusha ànu mu. . . mupicile kùdì Yòzefù, ne mpungì ùvwa ùdila ne cinù cyònsò civwa citwa panshì kumpàlà kwà Yòzefù: cifwànyikijilu cipwàngàngàne cyà Kilistò. Ùvwa n'Nyumà wa Kilistò musòmbèlè munda mwà bantu abu. Nwamònu anyi?

<sup>392</sup> Mpindyewu, mpindyewu apa pàakafwà Yesù apu, ùvwa n'Nzambì mumwènèshiibwe mu mubidi. Nzambì wàkalwa muntu. Mu mikenji yà bupikudi, mùshindù wùmwèpelè wùvwàku muntu mwà kupikula bintu bijimine byà Izàlèlèlè, bìvwa bìkèngela ìkalè cilongo. Bìvwa bìkèngela ìkalè cilongo cyà pabwìpi. Mukàndà wà Luutà wùdì wùcyùmvwija bilenga menemene; ne bìvwa bìkèngela ìkalè cilongo. Pa nànkù bìvwa bìkèngela bwà Nzambì àlwe cilongo kùdì muntu, bwà muntu kumònayè mwà kulwa cilongo kùdì Nzambì. Nwamònu anyi?

<sup>393</sup> Yèyè ùdì ne nyumà munda mwèndè, muntu ùdì nendè pàdiye ùlediibwa, bwalu nnyumà wa mu bufùki. Nnyumà wa pa buloba, nnyumà wa—wa nzambì wa pa buloba ebu. Yèyè udi ànu mùtòlokù wà Adàmà cyanààna.

<sup>394</sup> Muci wùtu wùvulangana. Bukwàmici bùtu bùvulangana. Nyama yìtu yivulangana. Bantu bàtu bàvulangana. Bòbò mbintu byangacila ku bufùki bwà ku cibangidilu. Nwacyùmùvù anyi?

<sup>395</sup> Mpindyewu, mpindyewu pàdi muntu ùlediibwa, ùdì ùlediibwa munda mwèndè amu ne nyumà wa pa buloba. Ki

bwà cinyi bìdi bikèngela àlediibwè cyàkàbìdi. Bwalu ewu nyumà mmufùmine ku diimiciibwa dyà kùdi taatù ne maamù, cìvwà ciikàle diimiciibwa dyà ku disangila dyà mulùme ne mukàji, ne kakùyi mpatà to yèyè kî mmufwànyine kwikala ne mwoyi kashidi to. Pa nàнку bikèngela àlediibwè cyàkàbìdi. Ne kumpàlà kwà kwenzayè aci, byàkakèngela bwà Nzambi àpwekè pa buloba ne àsebelè njila bwà yèyè kulediibwa cyàkàbìdi; bwalu kàvwa ne mùshindù wà kudipikula yèyè mwinè to, ùvwa kàyi ne ditèkemena to. Yèyè kàvwa. . .kàyi ne ditèkemena, kàyi ne Nzambi, kàyi ne Kilistò to, pa buloba, mujimine ne bwèndè butùùke. Yèyè—yèyè. . .kàvwakù ne cìvwàye mwà kwenza nànsha cimwè bwà kudisùngilayè to. Yèyè. . .yònsò. . .Nànsha byòbì ne ùvwa mwakwidi munène, nànsha yèyè mwèpiskòpò, ní ùvwa paapà, cyònsò cìvwàye aci, yèyè mmupiile ànu mùdi muntu yònsò.

<sup>396</sup> Pa nàнку, bìvwa bikèngela Kampànda uvwa kàyi mupiile to, bwà àcyènzè. Ne Kampànda umwèpelè uvwa kàyi mupiile ùvwa n’Nzambi Nkààyèndè. Nènku bìvwa bikèngela bwà Nzambi àlwe pa buloba bwà àlwe muntu (ne Wàkalwa mu mmwènekelu wa Kilistò) bwà kushimika kalonda kàà lufù, bwà kujoomona kalonda kàà lufù, bwà kutùpikula, bwà twètù. . .kàkùyi ku byenzedi byètù anyi ku bwìmpè bwètù to (twètù katwèna naabi mene to), kàdi ku ngàsà Wendè, bwà twètù kusùngidiibwa. Dìbà adi tudi tupeta Mwoyi Wendè mu mubidi wà cìfwàkà ewu, nènku mpindyewu tudi bânà bàà balùmè ne bàà bakàji bàà Nzambi, ne tudi ne Mwoyi wa Cyendèlèlè munda mwètù. Tudi bânà bàà balùmè ne bàà bakàji bàà Nzambi. Ki bwà cinyi, Yesù, mwikàle ne mwoyi. . .

<sup>397</sup> Nènku muntu nànsha umwe, nànsha mwikàle mubì bìshi anyi mwìmpè bìshi, pàdìbi bikèngela bwà yèyè. . .pàdiye ùshiyangana ne buloba ebu, kî mmufwè to. Ùdi mu mwaba kampànda mukwàbo. Kàdi ùdi ne mwoyi wikalà mwà kubùtuka, paanyimà pàà yèyè mumanè kunyookiibwa mu ifernò bwà byenzedi byèndè, yèyè. . .kàdi nànsha nàнку mwoyi awu wùdi ne cyà kujika. Kùdi mùshindù ànu wùmwèpelè wà Mwoyi wà Cyendèlèlè.

<sup>398</sup> Mpindyewu, tukàadi balongèshe aci. Bu muntu mwà kwikala ngènzàmpèkàatù ne kunyookiibwayè bwà kashidi. . . Kèna mwà kunyookiibwa bwà kashidi to ànu yèyè ne Mwoyi wà Cyendèlèlè. Piikalaye ne Mwoyi wà Cyendèlèlè, s’mmusùngidiibwe. Nwamònu anyi? Pa nàнку kùdi mùshindù ànu wùmwèpelè wà Mwoyi wà Cyendèlèlè, ne ki *Zoe*, “Mwoyi wà Nzambi.” Nènku yèyè kèna mwà kubùtuka to.

<sup>399</sup> Kàdi beena lwonji bàdi mu mwaba wà—wà dindila (mu dikèngeshiibwa) dyà dilumbulwishiibwa dyàbò (bwà kulumbulwishiibwabò bilondèshile byenzedi bìdi byenjùibwe mu mubidi) ku ditùkù dyà ndekeelu. Mpindyewu, kàdi tudi. . .

mpèkaatù yà bàmwè bantu yidi yiya kumpàlà kwàbò, yà bàmwè yidi yibàlonda.

<sup>400</sup> Mpindyewu twètù tutonda mpèkaatu yètù, Yèyè udi mwakàne bwà kutùfwila luse, ki bwà cinyi kabyàkukèngela bwà twètù kupita ku cilumbulwidi cyà Nzambi nànsha. Nwacyūmvù anyi? Tàngilààyi, Loomò 8.1: “Ki bwà cinyi kakwèna mpindyewu dipiila nànsha òmwè bwà aba bàdi mu Kilistò Yesù to.” Aba bàdi MU Kilistò. Bàdi buumùke ku lufù bayè ku Mwoyi abu; nwamònu’s, katwèna ne dipiila to bwalu tuvwa mu Kilistò Yesù. “Aba bàdi kabàyi bènda bilondèshile mubidi to, kàdi bilondèshile Nyumà.” Nwamònu anyi? “Ewu udi umvwa Mèyi Àanyi, witabuujà Yèyè udi muNtùme, ùdi ne Mwoyi wa Cyendèlèlè.”

<sup>401</sup> Ne piikalàbi ne ndi mwitabiibwe mu Kilistò, ne Kilistò mwangàte dilumbulwisha dyanyi, ne mèmè mwitabe difuta Dyèndè dyà cibawu bwà mpèkaatù yanyi, mmunyi mùdi Nzambi mwà kundumbulwisha? Yèyè’s ùkaadi mumanè kundumbulwisha, pàakalumbulwishàYe Kilistò apu. Dìbà adi ndi musùlùdiibwe ku cilumbulwidi. “Dìbà adi pàNgàamòna Mashì, Nèmpicilè pamutù pèènu.” Nwamònu anyi?

<sup>402</sup> Kàdi, mpindyewu, mwena lwonji kèna yèyè nànkù to. Yèyè ùdi ùbwela mu mwaba wà dikèngeshiibwa. Ne tudi bamanye ne aci ncilelèlè. Mwena lwonji ùdi ne mwoyi. Ùdi mu mwaba wà dikèngeshiibwa. Ùdi mu mwaba wùdiye kàyi mumanyè. . . Mùshindù awu ki wùdi beena mbùkù aba ne baamwamùlopò bàbiikidisha nyumà yà bantu bàkaadi bafwè eyi, mùshindù kampàndà wà bilèlè byà manàyi ne byà bukooyà ne bikwàbò bìdìbò bàlāsula abi, ní nukààdikù bamòne bimwè byà ku byòbi. Èyo. Bwà cinyi? Kabèèna. . .

<sup>403</sup> Tàngilààyi Mándèmwàzèlè Piper ewu, kumpàlà kwà kaabwalu kàanyi kàà *Cishimà cyà Donny Morton* aku kupàtukakù. Mbanganyi bàdiku babalè kaabwalu aku? Èyowà, bààbùngì bàà kunùdi mbakàbalè, bushùwà. Ne kàdi mu *Reader’s Digest*. Nukààvwakù bamòne anyi? Ànu babwìpì ne kòkò aku kupàtukakù, Mándèmwàzèlè Piper wàkapàtuka, mwena lubùkù mutàmbe bunène ukàadi bàà pa buloba bamanyèku kacya awu. Mabèji dikùmi ne àbìdi àkafidiibwa bwà kaabwalu kèndè kalonda aku. Ne munda mwa bidimu makùmi àtaanu. . . Mbayààyaàye nendè buloba bujimà, ne bileeji byà maalu a mamanya ne bikwàbò byònsò ne, “kakùyì mpatà to yèyè ùdi ùyiikilangana ne bafwè, ne bantu abu bàdi bàbànda.” Cinyi? Dìna dyà Nzambi kadivwakù ditèèdiibwe musangu nànsha wùmwe to, ní nkanyinganyinga, ní ndyondopa dyà kùdi Nzambi, ní ncinyi pa Cyòci aci, nwamònu’s.

<sup>404</sup> Cintu cimwèpelè civwàku, ànu bantu abu bààkatèèla ne: “John, kwèna mummanyè anyi? Mèmè’s ndi George uvwa mu mwaba *kampanda* awu, ne mèmè ngwàkenza *bikampanda*

ne *bikansanga*. Udikù muvùlùke mwaba wutùvwà bayè bakenzè cikampànda awu anyi?” Nwamònu’s, ki cyònsò cidìbo bamanyè’s. Kwàbò nkumanè kujika. Bayè dyàmwàmwà dyà. . . Kì—kì nkubàshààdìle cintu nànsha cimwè to ànu cilumbulwidi.

<sup>405</sup> Kùdì mucì mwinàmìne aku, nkwàdìshìndilàwu. Ne mu mùshindù wùdì ufwà awu. . . Ki bwà cinyi ntu mpanganangana ne masambila a bafwè, nwamònu’s, dyakwilangana dyà ne masambila anyi—anyì bwobùmwe bwà bansantu ne bikwàbò. Kabyènakù mwà kwikala nànkù to, bilondèshìle Dìyì dyà Nzambi. Kabyèna ne dikwàcìsha nànsha dikesè to bwà kusambidila muntu pàkaadiye mumanè kufwà. Kwèndè nkumanè kujika. Ùdì . . . ùdì ne. . . Ùkaadi musambùke mukàlù pankacì pàà luse ne cilumbulwidi. Anyì mmuyè ku luse, anyì mmuyè kule ne luse. Yesù wàkamba nànkù, mu nshapità wa 16 wa Maatààyi Munsantu, Wà—Wà—Wàkalongesha nànkù; nshapità wa 16 wa Maakò, ngeela meeji ne nyèyè. Muntu mubanji ne Lazàrò; muntu nànsha umwe kèna mwà kusambuka lupòngò elu to, ne kàadyàkulùsambukakù to! Ki bwalu mbwabù’s. Nwamònu anyi? Pa nànkù aci ncikòse bwalu’s.

<sup>406</sup> Mpindyewu, kàdi pààkafwà Kilistò, bìvwa bikèngela bwà bintu byònsò kufilabì bujaadiki ne Yèyè ùvwa Kilistò. Mpindyewu tuyaaku ku lukonko lwèbè. Cintu cyà kumpàla, mitootò yàkabènga kukenka, dìbà dyàkabwela, ngondo wàkabènga bwà kufila bukènkè bwèndè, buloba bwàkalùka mabwe ààbù, ku lufù Lwèndè. Ne Yèyè wàkaya kayiisha misùùkà yìvwà mu bùlokò, yìvwà kayiyi minyingàlale musangu wà lutùùlù lwà mu matùkù a Noà ayi. Yèyè, bìvwa bikèngela bwà bòbò kujingulula. Tàngilàayi aci! Ne kwòkù ngènzànpèkàatù ku mpùùkàpùùkà kaaba aka dilòlò edi, anji elàngànàku meeji kakesè pa bwalu abu. Dìngà ditùkù Èvànjeeliyò ùdì utèeleja ùyiishiibwa mpindyewu mene ewu, nebikengelè bwà wèwè kufidila bujaadiki ku Yèyè. Mwaba kampànda wadyàkutwàku cinù panshì, nànsha wèwè mwikàle nganyì. Bìdì mwà kwikala mu bidimu binunu dikùmi kuumukila ku leelù ewu, bìdì mwà kubènga kwenzeka too ne. . . mu dindà. Dìbà dyònsò diikalabì adi, wèwè’s wadyàkutwàku ànu cinù panshì mu mwabà kampànda, ne neùmvwè Èvànjeeliyò umwèumwè ewu wàlukila ùyiishiibwa kùdì.

<sup>407</sup> Bwalu paanyimà pàà misùùkà ayi mimanè kwikala mu bùlokò, yìvwà kayiyi minyingàlale pààkayishà Henòkà ne bakwàbò bònsò abu, ne Noà apu. . . ne bwà lutùùlù lwà Nzambi, ànu mùdìbì mpindyewu emu, bindìle bwà dìbà adi kulwadì. Ne Noà ne Henòkà ne bakwàbò bònsò abu bààkayishà, kàdi bantu abu bààkabàseka ne bààkabèèlulwila. Nènku bàvwa mu nzùbu wa lukànu, ne Yesù wàkaya kayiisha misùùkà yìvwà mu bùlokò ayi. Yèyè wàkafila bujaadiki! Maulu àkafila bujaadiki ne ùvwa n’Yèyè, buloba bwàkafila bujaadiki ne ùvwa n’Yèyè, ifernò wàkafila bujaadiki ne ùvwa n’Yèyè!

408 Bible mmwambè ne cidi...Davidi, kùkaadi bidimu byàbùngì, mu Misambu...Èyo, Mwanèètù, balà Misambu, bu wèwè mwà kuswà mwaba awu. Misambu 16.10: [Mwanèètù Neville ùdi ùbala Mufùndu—Muf.]

*[Bwalu kwàkushìya musùùkà wànyì mu ifernò; anyi kwàkwitaba bwà Wa Cijila webè àmonè dibola nànsa.]*

409 Balà cintu cìmwècìmwè aci, mwanèètù, mwaba wàkayiishà Peetèlò awu, mu Byenzedi, nshapità mwi2, mvensà wa 27. [Mwanèètù Stricker ùdi ùbala Mufùndu—Muf.]

*[Bwalu kwàkushìya musùùkà wànyì mu ifernò, anyi kwàkwitaba bwà Wa Cijila webè àmonè dibola nànsa.]*

410 Balà mvensà yìbìdì kumutù kwàcì aku, mwanèètù, bwà wamòna mwà kupeta dyumvwija dyàcì.

*[Bwalu Davidi ùdi wàmba bwà bwalu Bwèndè ne, ngàkadyànjila kumòna Mukalenge misangu yònsò kumpàlà kwànyì, bwalu yèyè ùdi ku dyà dyàbalume dyànyì, bwà ncinyungishiibu nànsa:]*

*[Ki bwà cinyì mwoyi wànyì wàkasànka, ne ludimì lwànyì lùwà ne disànka; kàbìdì mubidì wànyì newìkìshè mu ditèkemen:]*

*[Bwalu kwàkushìya musùùkà wànyì mu ifernò, anyi kwàkwitaba bwà Wa Cijila webè àmonè dibola nànsa.]*

411 Balàaku mpindyewu mvensà udi ulonda awu,

*[Wèwè udi mummanyishe njila yà mwoyi; neunguujè tètè ne disànka ne lukebu lwèbè.]*

412 Èyowà, mònaayi. Mpindyewu, wèwè mulundà wanyì Ntèmù wa Yèhowàh, ndi muswè nkwelèku lukonko pa bwalu abu. Wamònu anyi? Pìikalàbì ne ifernò mmwaba, Ngenà, Mwaba wà bafwè, mwònsò muwàswà kucibùkila amu, pìikalàbì ne aci cidi cìjikila mu lukità, kàdi mbwà cinyì Yèyè wàkamba ne: “Ncyàkushìya musùùkà Wànyì mu ifernò, anyi ncyàkwitaba bwà Wa Cijila Webè àmonè dibola”? Udi wamba bishi bwà aci nànkù? Nwamònu anyi?

413 S'ki Mubidi Wèndè wùvwà apa ewu, mu lukità; ne musùùkà Wèndè mwikàle mu ifernò, munkacì mwà kuyiisha, mwikàle ne mwoyi! Kàdi bishi bwà aci nànkù? Ùkaavwa cyàkàbìdì mu tèòfàní Wèndè. Musùùkà Wèndè wùvwà kwàka ne bantu bàvwà pààbò mu tèòfàní abu. Ne mwikàle ùbàpèèsha bujaadiki ne, bóbò “kabàakanyingalala mu lutùlù amu to.”

414 Yèyè...Mu ngaakwilù mukwàbò, Wàkakookola ku ciibi. Ne pàakunzulukà ciibi, ne misùùkà yònsò yàkanyingalalà ayi, Wàkamba ne: “Ndi Dimiinù dyà mukàjì adi. Ndi Ewu uvwa Henòkà ewu...” Mu mpàlàdizù mwàmwa, mu mukwàbò mwaba. Mpindyewu, kanùjimìjìkù myaba yisàtù ayi to: mwaba

wà beena lwonji, mwaba wà baakàne, ne ifernò yéyè mwinè. Nwamònu anyi?

415 Ànu mùdì búsàtù bwà mu Dyulu abu, bu mùdì: Taatù, Mwànà, ne Nyumà Mwímpè. Bu mùdì búsàtù bwà nyama wa lwonji: mupròfetà wa mashimi, nyama wa lwonji, ne—ne cimanyinu cyà nyama wa lwonji. Nènku byònsò abi, vùlukàayi ne, byònsò abi bìdì mu búsàtù. Búsàtù bùdì bwènza ùmwè, mupwàngaja. Ùmwè mmupwàngaja. Wèwè udi mupwàngaja, ùmwè mu isàtù: musùùkà, mubidi, ne nyumà; mâyi, mashi, ne tujilujilu twà mutù. Nwamònu's, cyònsò cyúvwà aci, bìdì bikèngela bwà wàngatè isàtù bwà kwenza ùmwè mupwàngaja. Angàtà kapese kàà lumwènù kàà matumba àsàtù ne ùtwepù nsèsà yà díbà, udi upeta mwanzankòngòlò mupwàngaja. Nwamònu's, byònsò, bikèngela wikalè ne isàtù bwà kwenza ùmwè mupwàngane.

416 Nènku mpindyewu, vùlukàayi ne, pàakafwàYe, Wàkanji kuya dyàmbedi kayiisha misùùkà yìvwà kayiyi mu bùlokò. . . yìvwà mu buloko ayi, ne wàkafila bujaadiki ne Yéyè nguvwa “Dimiinu dyà mukàji” adi. Yéyè nguvwa “Ewu uvwa Henòkà mumòne ùlwa ne binunu dikùmì byà bansantu Bèndè awu.” Byàkakèngela bwà Àfilè bujaadiki bwà Mifùndù yàkayishiibwà kùdì Noà, ne kùdì Henòkà ayi, ne kùdì baakàne ne, “Ùvwà n'Yéyè awu.” Bìvwà bikèngela bwà bintu byònsò bìCijingùlùlè!

417 Pashiishe Yéyè wàkabànda mu ifernò, ne wàkapeta nsapì yà lufù ne ya ifernò kùdì dyabùlù.

418 Wàkaalukila kuulu aku e kubwela mu Mpàlàdiizò; ne kulwa ne Abraham, Izàkà, ne Yakòbò, ne baakàne abu; ne wàkabiika ku lufù (Maatàayi 27), ne bààkapàtuka mu lukità ne bààkabwela mu cimenga, ne bààkamwènekela bantu bàvwà bènda mu mùsèèsù. Àlèluuyàh! Ki bwalu mbwabù's!

419 Mpindyewu, kàdì mubidi Wèndè. . . Pàcìvwà musùùkà Wèndè apa munkacì mwà kufila bujaadiki kùdì bajimìne, mwinshì emu munkacì mwà kunyènga dyabùlù nsapì, ne wàlukila ne ùlwa ne Abraham ne Izàkà apu; musùùkà Wèndè wùvwà mulàadika mu. . . musùùkà Wèndè wùvwà mwinshì mwàmwa wùbyènza, ne mubidi Wèndè mulàadika mu lukità. Kì bwà cinyi Yesù wàkamba. . . Bantu bàtu bàmba ne: “Ee, bwà cinyi Yesù ùdì wàmba ne: ‘Matùkù àsàtù, Mémè nèngùjuulè. Mu matùkù àsàtù Mémè nèmbiikè ku lufù.’? Yéyè—Yéyè's wàkafwà mu diitànù mu mapingaja, mubiike ku lufù mu dindà dyà dyàlumingu.”

420 Kàdì tàngilàayi, cìvwà “*munda mwà* matùkù àsàtù,” bu nwènù mwà kwikala ne nkòngamyakù. Bwalu Yéyè ùvwà mumanyè ne Davìdì, mu dilaabiibwa (dyà dilaabiibwa dyà Nyumà Mwímpè), wàkamba ne: “Ncyàkwanyishakù bwà Wa Cijila Wanyì àmonè dibola nànsa.” Yéyè's ùvwà mumanyè ne aci cìvwà Bwèndè Yéyè. Ùvwà mumanyè ne aci cìvwà

cìMwamba Yèyè. Yèyè nguvwa Wa Cijila wa Nzambi awu, ne Ùvwa mumanyè ne dibola ditu dibanga munda mwà mèbà makùmi mwandamutekètè ne àbìdì. Mwaba kampànda munda mwà matùkù àsàtù awu, Yèyè uvwa ùpatukamù, bwalu Mifùndu kayèèna mwà kunyangakajiibwa nànsha.

<sup>421</sup> Ne mulayi ne mulayi wònsò Mwòmù amu ùdì muntàngile mèmè ne mukutàngile wèwè, ngwètù!

<sup>422</sup> Yèyè kwamba ne: “Shimbùlaayi mubidi ewu, ne Mèmè nèngùjuulè mu matùkù àsàtù.” Bwalu Yèyè wàkamba ne: “Ncyàkulekela musùukà Wanyì mu ifernò, anyì ncyàkwitaba bwà Wa Cijila Wanyì àmonè dibola nànsha.”

<sup>423</sup> Ùvwa mumanyè ne, mu matùkù àsàtù mubidi awu wùvwa wùpàtukamù. Yèyè kàakashààlamù matùkù àsàtù bulubulu nànsha. To, mukalenge, Kàakashààlamù to nànsha kakesè. Yèyè wàkashààlamù ànu kuumukila ku diitànù mu mapingaja too ne mu dyàlumingu mu dindà, kabùlù kàà mashi nànsha kàmwè kàkavwakù kafwànyine kubola nànsha.

<sup>424</sup> Ne Yèyè ùvwa mufwè, mwela manga a dibènga-kubola, ne ùvwa mulaadika . . . anyì mujìngila mu cilàmbà, ne mulàadika mu majambu. Mu ditùnga adi dyà luuyà lukolè, dyà bisènsè, kwenza ànu ndambù wa mèbà cyanààna Yèyè's ùvwa ùbanga kubola. Paùdì ànu ubanga kuteket-. . .kuteketangana, nudi bamanyè's, mubidi wèndè, dyùlù dyèndè didi dibèetelela ne bikwàbò, dibola dibanga; mu ditùnga dyà luuyà lukolè, dyà citaleela. Nùnkù wòwò's mmubangè kunyanguka, bwalu wùvwa mmubidi. Kàdi Yèyè ùvwa mumanyè ne, kumpàlà kwà kabùlù kàà mashi aku kunyangukakù, Nzambi wàkambila mukana mwà Davidì mupròfeta ne: “Ncyàkwitabakù bwà Wa Cijila Wanyì àmonè dibola nànsha.”

<sup>425</sup> Mùshindù mwinè wàkangatàYe Dìyì dyà Nzambi ne kwikala ne mwoyi ku Dyòdì's wè! Mpindyewu, wònsò wà ku milayi ayi muntwamu wùvwa wùMutàngila awu, Nzambi wàkuuja wònsò wà ku yòyì. Ne mulayi wònsò wùdì wùtàngilà mwena kwitabuuja awu, Nzambi neujè mulayi wònsò wà Cyòci aci. Amen. Shààla ànu ne ditwishiiibwa dyònsò ne Cìdi Bulelèlè. Amen. Pa nànkù, musùukà Wèndè. . .

**Udi wèwè wela meeji ne bidi. . .To, mfwilaayikù luse.  
Nyumà wa Yesù ùvwa penyì munda mwà matùkù àsàtù àvwà  
mubidi Wèndè mu majambu awu?**

<sup>426</sup> Nyumà Wèndè ùvwa mu ifernò, mwàmwà mu myaba yà mitàmbe kwikala yà mwinshì ayi; kàdi Yèyè wàkabiika's. Ne ndi mufwànyine kusàkidila kaadìyì kakesè—kakesè mwab'ewu kàdi kafwànyineku kunwàmbulwisha bikolè. PàakabiikàYe ku lufù, Wèndè. . . PàakabiikàYe ku bafwè, kakùyì mpatà to Yèyè kàvwakù mwanjì kujikija mudimu wà bupikudi to. Ncyà bushùwà. Byàkakèngela bwà kusukulaYè cintu cyònsò mu kaabujimà. Mushinga wùkaavwa mumana kufuta, kàdi bwòwà



bwà ifernò abu, bwôwà bwà lukità abu... Ne apa, Yèyè—pàakafwàYe, Wàkatùngunuka buludi. Yèyè kààkiimanyikakù kukwàta mudimu pàakafwàYe apu to, Wàkatùngunuka ànu ne kuyiisha!...?...Mfwilaayikù luse bwà dyenza dyànyi dyà maalu didi dipangè bupwekèle, ngeela meeji, kàdi Yèyè kààkiimanyikakù to!

427 Wèwè kwàdyàkufwàku to! Mubidi wèbè mmufwànyine kushààla mwikishe bwà cikondo kampànda, kàdi Nzambi neàwùjuulè, Yèyè mmulayè ne Neénzè nàнку. Kadi kwènàku mwà kubùtuka to ànu mùdi Nzambi kàyi mwà kubùtuka amu. Ncyà bushùwà. Tàngilàayi, Wèndè...paanyimà pàa Yèyè mumanè kufwà, ku cìwà...mufwè bwà bìvwà bitàngilà bayiidi. Ûvwa mulààle tulù, kí cìwàYe wenza. Bàvwa baMulààdike tulù; mwàkambàYe bwà Lazàró amu ne: “Nènye kamubiisha.” Bìvwa bikèngela bwà Nzambi àMubiishè.

428 Tàngilàayi, Wàkatùngunuka ànu ne kwenda kupweka, Wàkatùngunuka ne kuyiisha. Ne Wàkayiisha misùukà yìvwà mu bùlokò emu eyi. Kutùngunuka e kubwela mu ifernò, kunyènga dyabùlù nsapì. Kwalukila buludi ne kuyiisha cyàkàbìdi mu Mpàlàdiizò, ne kubiika ku lufù mu ditùkù diisátù. Kumwènekela bàpostòlò Bèndè munda mwà matùkù makùmi ànaayi, ne ku ndekeelu kwà ditùkù dyà makùmi ànàayi, kubàndaYè buludi; bwalu, byònsò bìdi kumutù kwètù abi, miitabuuja a màjimbù ne bikwàbò byònsò abi...Wàkakòsa diitabuuja dyònsò dyà màjimbù, mpatà yònsò, ne kwenza nshinga wa disambila kuumukila pa buloba too ne mu Butùmbi mu kubànda Kwèndè amu. Wàkabànda ne kuya kasòmba ku dyàbalùmè dyà Mutàmbe Bunène. Mucimunyi! Mucimunyi Munène, kakùyi mpatà to. Lufù kalùvwakù mwà kuMulama to! Ifernò kàvwakù mwà kuMulama to! Buloba kabùvwakù mwà kuMulama to!

429 PavwàYe pànu pa buloba, Wàkapèèshiihwa... Wàkaya ku cimenga cyà citàmbe kushààdila ne kùdi bantu bàà batàmbe kushààdila, ne kupèèshiihwa dìnà dyà ditàmbe kushààdila. Aci ki cidi muntu mwenzè Bwèndè Yèyè. Wàkaya ku Yelèkò, cimenga cyà citàmbe kushààdila. Byàkakèngela bwà muntu wa mutàmbe bukesè àbandilè kuulu kwà mucì bwà kutàngilayè panshì bwà kuMumòna. Ki kùdi muntu muMutèèke nkwòkù aku. Yèyè ùvwa mwoweshanganyi wa màyi ku makàsà, mudimu wà mutàmbe bubì wùvwàku mufwànyine kupèèshiihwa. Wàkalwa mutàmbe kushààdila. Ne bàakaMwinyika dìnà dyà ditàmbe kushààdila divwàku difwànyine kupèèshiihwa ne, *Beelèzèbùlà*, “mfùmù wa baadémons.” Muntu wàkaMupèèsha dìnà dyà ditàmbe kushààdila, mwaba wà mutàmbe kushààdila, ne wàkaMutùma mu myaba yà mitàmbe kushààdila yà ifernò wa mutàmbe kushààdila.

430 Nzambi wàkaMubiisha ku lufù ne wàkaMutùma mu Maulu a matàmbe Kutùmbuka, ne Dìnà dyà kumutù kwà dìnà dyònsò. Àlèluuyàh! Mòna's, bikèngela mene kutàngidilaYè panshì bwà

kumòna Dyulu. Nkwasa Webè wa butùmbi mmubàndishìibwe kuulu kwà mauu a Dyulu. Ne bikèngela bwà Dìná dyà ditàmbe bunènè dikaadìku dipèèshìibwe mu Dyulu ne pa buloba kwikaladi...ndìdì diMulamàte. Ki civwà Nzambì muMuvwijè. Muntu mmuMutèèke mutàmbe kushàadila, kàdi Nzambì mmuMuvwijè Mutàmbe kutùmbuka. Ki Yèyè awu's, kuumukila ku mutàmbe kupwekela, too ne ku Mutàmbe kutùmbuka.

<sup>431</sup> Wàkalwa mutàmbe kushàadila bwà Wàmòna mwà kutùbàndisha kùdì Mutàmbe kutùmbuka. Yèyè wàkalwa twètù, bwà ku ngàsà Wendè twètù twamòna mwà kulwa Yèyè, bàna bàà Nzambì. Ki kwàkayàYe. Amen! Dìná Dyènde dībeneshiibwè. Wàkasebela njila, bwà twètù pèètù twamòna mwà kulwa, dīngà ditùkù: “Bwalu Mémè ndi ne mwoyi, nwènù pèènu nudi ne mwoyi.”

<sup>432</sup> Kaa, kabyèna bikèmesha to...Pàdì muntu ùbàkula cìkèènà-kumòna aci, kacya kakùtukù kwanjì kwikala muntu mufwànyine kucyùmvwija to. Bàkaadikù mene bateetètèete kucyùmvwija, bàjīmija ne lungènyi; musambu munèene ewu: “Kaa, dinanga dyà Nzambì, mùshindù mwinè wùdìdì dibanjike ne dikezùke's wè! Mùshindù mwinè wùdìdì kadìyi kwondola kumana ne dikolè!” Cìtùmīnyī cyà ndekeelu aci...anyī ngeela meeji ne cìtùmīnyī cyà ntwàdījīlu, cīdī ne: “Bu twètù mwà kuuja mbù tètè ne màyi a mufundu, Ne bu mauu mavwijìibwe mukàndà muvùnga;...” Nudi bamanyè mwaba wùvwàbo bacisangàne anyi? Cifùnda pa...cimanu mu lùpitaadì lwà babùlùke. Muntu nànsha umwe kēna mwà kuumvwijakù Dinanga dyà Nzambì adi to. Kaa, kaciyènakù mwà kwambiibwa to, bìdīYe mutwènzèle abi. Ekèlekèle, mmunyī mùdiku mwà kutèeka didikùmbanyina dīmwpelè mwòmù amu? Ngàsà Wendè, kuumukila ànu ku ntwàdījīlu too ne ku ndekeelu. Mémè mvwa mujīmīne, mucīmūnyīibwe, ne ncīyi pabwàsà, ncīyikù mwìmpè to, cintu nànsha cimwè pa bwalu abu, kàdi Yèyè ku ngàsà Wendè kulwa e kutùsùngila. Kaa, ekèlekèle. Ki Dyèndè... Ki Mukalenge wanyī nyawù. Ki dinanga Dyèndè ndyòdì adi, ki bwìmpè Bwèndè mbwòbù abu.

<sup>433</sup> Mpīndyewu tudī ne tusunsa tutwè ku mwandamutekète ne nkonko mitwè ku dikùmi ne yītaanu ne... .

## **62. Wèwè udikù wela meeji ne mbìmpè bwà bakàjì kukwàtabò mudimu wàbò wà nkààyaabò pambèlù pàà èkèleeziyà anyi?**

<sup>434</sup> Èyowà. Aci cīdī ànu ndukonko cyanàànà, ànu...kī ndukonko lwà mu Mifundu to, kàdi...Cyà bushùwà, ki mùndì mèmè ngeela meeji. Èyowà's, mukalenge, tudī bōnsò bakwàcishanganyī mu mudimu. Bakàjì bàdī ne yàbò myaba, ne ncyà bushùwà ne bàdī naayī. Èyowà's, mukalenge. Enzà wèwè ànu mudimu wònsò wà nkààyeebè wùdì mwà kwenza awu, nènku Nzambì neàkubènèshè bwà wòwù awu.

Èyo, mpindyewu twánjì tùmónààyìbì tǔng:

**63. Bu wêwè mwà kuswà umvwijàku búsàtù. Mmunyì mùdìku Mwànà mwà kwikala musòmbe ku dyàbalùmè dyà Taatù, mwikàle wàkwilangana bwà...kùdì Taatù, pìikalàbo kabàyi baapèrsonà bàbìdì?**

<sup>435</sup> Èè, mulundà wanyì munanga, aci's cidi...aci's—aci's ndibuulula. Pìikalàbì ne Yesù wákamba ne: “Mémè ne Taatù Wanyì tudi Umwe,” díbà adi mmunyì mùdìbo mwà kwikala bàbìdì? Nwamònu anyì? Mpindyewu, kabèèna bàbìdì to.

<sup>436</sup> Musangu kampànda mukàjì mukwàbò wàkangambila, nènku mémè mvwa ngumvwija cyòcì aci, kwambayè ne: “Wêwè ne mukàjèèbè nudi—nudi bàbìdì, kàdì pààbì's nudi umwe.”

<sup>437</sup> Mémè ne: “Kàdì, Nzambì ne Mwànà mbishìilàngàne ne aci, wamònu's.” Mémè ne: “Udi mummòne mémè anyì?”

“Èyowà.”

“Udi mumòne mukàjàànyì anyì?”

“To.”

<sup>438</sup> Mémè ne: “Dìbà adi, bwà Taatù ne Mwànà mbishìilàngàne; Yesù wákamba ne: ‘Paùdì muMmòne Mémè, udi mumòne Taatù.’” Nwamònu anyì?

<sup>439</sup> Taatù ne Mwànà...Taatù ùvwa Yèhowàh wa Bukolè bwònsò awu (Nzambì) musòmbèle mu ntentà ùbìikidiibwa ne n'Yesù Kìlistò, uvwa Mwànà mwela maanyi wa Nzambì. Yesù ùvwa Muntu, Nzambì ùdì Nyumà. Ne muntu nànsha umwe kàtukù mwanjì kumòna Nzambì musangu nànsha wùmwe to, kàdì mulela umwe wa Taatù ngudi muMwambè patòòke. Yèyè uvwa...Yèyè...Buumùntù Bwèndè, diikalakù Dyèndè, Bunzambì Bwèndè, cyònsò cìvwàYe aci, Yèyè ùvwa Nzambì! Yèyè kàvwa mushààdìle anyì mupite Nzambì ku kantù nànsha kàmwe to. Kàdì pààbì's, Yèyè ùvwa Muntu. Ùvwa Muntu, nzubu uvwa Nzambì musòmbèlemù. Neyà bushùwà, Ùvwa cisòmbedi cyà Nzambì.

<sup>440</sup> Mpindyewu, nwènù baswè ndambù wa Mifùndu pa bwalu abu: Mwanèètù Neville, bu wêwè mwà kumpetelakù Maakò Munsantu 14.62. Ne wêwè Mwanèètù wa bakàjì Wood, mpetèlèku Efèsò 1.20. Muntu mukwàbò ùdikù ne Bible anyì? Èè, elà cyanza muulu. Mwanèètù wa bakàjì Arnold, udi nendè kuntwaku anyì? Èyo, mpetèlaaku Byenzedi 7.55. Èyo. Maakò 14.62, Mwanèètù Neville; ne Mwanèètù wa bakàjì Wood udi ku Efèsò 1.20; Byenzedi 7.55, Mwanèètù wa bakàjì Arnold.

<sup>441</sup> Èyo, wàmupècì anyì, Mwanèètù Neville? Èyo, balààku mpindyewu: [Mwanèètù Neville ùdì ùbala Mufùndu—Muf.]

[Ne Yesù wákamba ne: Ndi: ne nenùmonè Mwànà wa muntu musòmbe ku dyàbalùmè dyà bukolè, ne ùlwa mu matutu a mu dyulu.]

442 Èyo, mpindyewu, tàngilàayi cyambilu cyà kumpalà aci. Yesù wákamba ne: “NDI.”

443 “NDI.” NDI awu ùvwa nganyi? Kacya kakùtukù muntu pa buloba bujimà udi mufwànyine kuDyùmvwija to. Nànsha mene...nwènù bàtù bàbàla nkòngamyakù ne bikwàbò, kakùtukù muntu udi mufwànyine kuumvwa...Didi J-v-h-u. Ne nànsha mene bamanyi bàà mabàlà bàà beena Ebèlù kabàvwakù mwà kuDìshindumuna to. Kaacipuka kàà kàlàkuka kapyà aku, ditùkù adi pàakatwilanganàYe ne Mòsà, Dìvwa J-v-h-u. Pa nànku bàvwà bàDìshindumuna ne “J-o-h, Jéhovah,” kàdi kaDyèna “Jéhovah” to. J-v-h-u, nwamònu’s, muntu nànsha umwe kí mmumanyè to.

444 Kàdi wèwè udi wamba ne: “Èè, Mòsà kàvwa mwà kuCyùmvwa to.”

445 Yèyè ne: “Ndi mwà kwamba ne nganyi?”

446 Yèyè ne: “Wàmbè ne: ‘NDI’ ngudi mukutùme. NDI.”

447 Mpindyewu mònaayaaku. NDI ndìbà dyà mpindyewu, kaciyi “Mvwa” anyi “Nèngiikalè” to, NDI. Mpindyewu, Wákamba ne: “Eci neciikalè civùlukilu mu nkòngo yònsò: NDI.”

448 Mpindyewu tàngilàayi Yesù mwimàne kaaba aka ku difestò ditùkù adi. Bòbò ne: “Bwà mpindyewu kaayi twàmanyi ne udi mupàle.” Mèyi a bushùwà nnè: “Udi ne mukupa,” (*Ne mukupa* mbwena kwamba ne “mupàle.”) “Twàmanyi ne udi mupàle. Udi mwena Sàmaalèyà, udi ne démon.” (Yone Munsantu, nshapità mwi6) Ki awu ne: “Mpindyewu, wèwè udi wamba ne udi...mumòne Abraham, pèèbè muntu wa bidimu kabìyi bipite pa makùmi àtaanu?” (Ùvwa mufwànyine kumwèka mukolè ndambù bwà cipimu Cyèndè, kàdi Pèndè ne bidimu ànu makùmi àsàtù cyanààna, kàdi mudimu Wèndè mukolè.) Awu ne: “Udi muswè kwamba ne wèwè ewu udi muntu wa bidimu kabìyi bipite pa makùmi àtaanu, kàdi wamba mùdi ‘mumòne Abraham’? Bwà mpindyewu kaayi twàmanyi ne udi mupàle.” Nwamònu anyi?

Yèyè ne: “Kumpalà kwà Abraham kwikalayèku, NDI.”

449 “NDI,” Yèyè nguvwa NDI munène awu. S’ki Yèyè ewu wàmabila cyàkàbìdi beena Yudà aba, nwamònu’s, “NDI! Kàdi panwàMmònà ndwa ku dyàbalùmè dyà bukolè,...” Ncyà bushùwà anyi?

450 Cibalùlùlè, mwanèètù wa balùme, [Mwanèètù Neville ùdi ùbala Mufùndu—Muf.]

[...panwàmònà Mwànà wa muntu musòmbe ku dyàbalùmè dyà bukolè, ne ùlwa mu matutu a mu dyulu.]

451 Balàaku webè awu mpindyewu, Mwanèètù wa bakàjì Wood. [Katùpà kùà mukàbà wà mèyi munda mutupù. Mwanèètù wa bakàjì Wood ùdi wàmamba ne: “Efèsò 1.20 anyi?”—Muf.] Èyowa’s, mwàbànà. [Mwanèètù wa bakàjì Wood ùdi ùbala Mufùndu.]

[*Wàkenzejayè mu Kilistò, pàakamubùishàye ku bafwè,  
ne kumutèèka ku dyàbalùmè dyèndè yèyè mwìnè mu  
myaba yà mu dyulu.*]

452 Èyo, balàaku webè, mwanèètù wa bakàji. Nwamònu's, Cìdi ànu cyòbi cimwècimwè aci, [Mwanèètù wa bakàji Arnold ùdi ùbala Byenzi 7.55—Muf.]

[*Kàdi yèyè, mwikàle mûle tètè ne Nyumà Mwìmpè,  
wàkatàngila buludì muulu mu dyulu, ne wàkamòna  
butumbi bwà Nzambi, ne Yesù mwimàne ku dyàbalùmè  
dyà Nzambi,*]

453 Mpindyewu, nudi numòna's, Yè-... Nzambi kàvwa mwà kwikala ne cyanza cinènè cyà dyàbalùmè to, nwamònu's, ne Yesù mwimàne ku dyàbalùmè Dyèndè. *Dyàbalùmè* mbwena kwamba ne “bukòokeshi.” Nwamònu anyi? Ànu bu cileejilu, ambàayi tũng bu ne mvwa ne bukòokeshi mu kaabujimà bwà èkèleeziyà, anyi ne mvwa mwèpiskòpò wa mùshindù kampànda, ne Mwanèètù Neville kwangatayè kaaba kàanyi, yèyè ùvwa mufwànyine kwikala dyàbalùmè dyànyì. Nwamònu's, mbwena kwamba ne yèyè udi. . . ùvwa mufwànyine kwikala ku dyàbalùmè dyànyì.

454 Mpindyewu, Yesù ùdi ku dyàbalùmè dyà Bukolè. Mpindyewu, Yèyè ùdi wamba nànkù, mu Efèsò emu, pàdiye ùcyùmvwija apu, Udi ku dyàbalùmè dyà Bukolè. “Makòokeshi ònsò mu Maulu ne pa buloba” (mwàkambàYe, paanyimà pàa dibiiikà Dyèndè dyà ku lufù) “mmafidiiibwe mu byanza Byànyì. Mémè ndi ne bukòokeshi bwònsò mu Maulu ne pa buloba. Ndàayaaku nùkalongèshè bàà mu matungà ònsò, nubàbatiiza mu Dìna dyà Taatù, ne Mwànà, Nyumà Mwìmpè, nubàlongesha bwà kwenzabò bintu byònsò biNdi munùtumine dīyī abi; mōnaayi, Ndi neenù misangu yònsò, too ne ku ndekeelu kwà buloba.”

455 “Bukòokeshi bwònsò mu Maulu ne pa buloba.” Aci cidi penyì. . . Kwòkò nzambi kampànda muulu mwàmwa pa kuumusha Yèyè, yèyè awu kèna ne bukòokeshi to. Nwamònu's, kī nkufwànyinekù kwikala Nzambi mukwàbò to. “Makòokeshi ònsò a mu Maulu ne a pa buloba” mmatèèka mu cyanza Cyèndè. Pa nànkù, nudi numòna's: “Mmwimàne ku dyàbalùmè,” (mùdi muntu awu mwelè lukonko), kī mbwena kwamba ne. . .

456 Mpindyewu tàngilàayi, mubidi. . . Nzambi ùdi Nyumà. Èyowà, mbanganyì bàdi bùmvwà aci? Ambàayi “Amen.” Nzambi ùdi Nyumà, Yesù m'Muntu, ne Yesù ùvwa Nzambi muvwijiiibwe mubidi. Yesù uvwa. . . Katùvwakù bafwànyine kumòna Nzambi to, nwamònu's, Yèyè n'Nyumà. Kwèna mwà kumòna nyumà to. “Muntu nànsha umwe kàtukù mwanji kumòna Nzambi musangu nànsha wùmwe to.” Muntu nànsha umwe kī mmufwànyine kumòna Nzambi to.

457 Nènku anyìshaayi ngámbe nùnkú ewu: “Kanùtuku banjì kummòna mémè ewu to.” Kanùtuku banjì kummòna to kacya bàànùlela, ne kanwàdyàkummònakù to. Ncyà bushùwà. Nudi numòna mubidi ewu wùdi wùleejà patòòke muntu ewu, udi munda emu ewu. Mpindyewu, mubidi ewu kawèna ne Mwoyi wà Cyendèlèlè to, kàdi nyumà ngudi ne Mwoyi wa Cyendèlèlè. Mubidi ewu newàlukilè, kàdi newùpatukè cyàkàbidi mu cimfwànyì cyàwù, ànu mùdi lutètè lwà blé lùya mu buloba amu. Bwena Kilistò mbushìndàmèene pa dibìikà dyà ku lufù, kí mpa dipingaja dyà cintu pa mwaba wà cikwàbò to. Dibìikà dyà ku lufù; Yesù umwèumwè wákaya mu buloba awu, n’Yesù umwèumwè wàkaalukila. Wèwè muyè mu buloba ne nsukì mikùnze, udi walukila ne nsukì mikùnze; wèwè muyè mu buloba ne nsukì mifìike, udi walukila ne nsukì mifìike. Nwamònu’s, ndibìikà dyà ku lufù.

458 Wèwè mubangè kudyà. . . Mvwa mukonkè ngàngàbukà cyôci aci, àbìdi aa, ngamba ne: “Bwà cinyì pàmvwà ne bidimu dikùmi ne bìsambòmbò. . . Dìbà dyònsò dìndì ndyà, s’ndi mvwijulula mwoyi wànyì mupyamùpyà’s?”

459 Yèyè ne: “Mmwòmò.”

460 Udi ubweja tubùlù twà mashi tupyatùpyà—tupyatùpyà musangu wònsò wùdi wenza. . . wùdi—wùdi mubidi wenza. . . anyì wùdi cyàkudyà cyèza tubùlù twà mashi, ne kabùlù kàa mashi aku kàdi kàtamba kukuwija ne dikànda. Kí mùdi wikala ne mwoyi nànkú. Dìbà adi, bìkengela bwà cintu kampànda kufwàci musangu wònsò, bwà wèwè kwikala ne mwoyi. Dìtùkù dyònsò, cintu kampànda cidi cifwa: wèwè udyà munyìinyi, ngombe mmufwè; anyì ní ncinyì cyònsò cyùdi udyà aci; mushipa mmufwè; anyì—anyì blé mmufwè, bwà kwenza dyàmpà; cilùngà cyà mpàtatà ncifwè, cidi cyèzè cilùngà cyà mpàtatà aci; ne. . . mùshindù wònsò wà mwoyi; wèwè udi mwà kwikala ne mwoyi ànu ku cintu cifwè.

461 Ne udi mwà kwikala ne mwoyi Cyendèlèlè ànu bwalu cintu kampànda ncifwè: Yesù. Kí mbwalu udi mukadìvwijè wa mu èkèleeziyà, kí mbwalu udi mubàtìjùbwe, kí mbwalu udi mujìkùle bwena Kilistò to; mbwalu udi mwitàbe Mwoyi wà Yesù Kilistò wùvwà muzolòlòja mashi. . . Mashi àkeediibwà panshì bwèbè wèwè, ne wèwè kuMwitaba bu Musùngidi webè sungasunga.

462 Mpindyewu, mònaayi, ndi nkonka nùnkú. Ndi njinga kunùkonka *nvènu* nùnkú. Tàngilàayi eci, s’mbilenga be. Pàmwàpa nkàadi mucìlongèshe kumpàla (ncyèna mumanyè to) mwaba ewu; mu kuyiisha kwà myaba yònsò, udi upwà mwoyi byùdi mwambè pa. . . mu myaba kampànda. Kàdi, dìbà adi, mbwà cinyì bìdi. . .

463 Mpindyewu, ngeela meeji, Mwanèètù wa bakàjì Smith. . . Ncyèna mumanyè ní mvwakù mumanyè Mwanèètù Fleeman mu

ciinè cikondo aci anyi to. Ne Tryphena, ndi mmuvùluka pàvwàye mwànà mukesè wa bakàji. Nudi bamvùlùke mèmè, pancivwà . . . mvwa wa citùpà, mwîpi, munène wa katankù; ne nsuki mifiike, myenzè mabùlámabùulà. Mvwa ne ciibidilu cyà kwenza manàyi a mànkómò. Kaa, mvwa ndyàmbidila ne mvwa muntu wa kapelu pa buloba. “Kaa,” mùmvwà ndyàmbidila, “kakwènaku muntu udi mwà kuncimuna mèmè to. To, mukalenge.” Kadi mèmè—mèmè kudidìnga pa cyòci aci, nudi numòna’s. Kadi mèmè . . . Mpindyewu, mèmè kudyàmbidila ànu ne: “Kaa, ekèlekèle.” Mèmè kudyàmbidila ne: “Wèwè mumentèke cintu eci paanyimà, s’ndi mufwànyine kuya ngenda mpweka naaci mùsèèsù.” Bushùwà’s, kakwèna cidì cìntàcishà to. Ne misangu yònsò yìndi ndyà, ndi ntàmba kudyunda ne kupeta makàndà dîbà dyònsò. Dîbà dyònsò dîndi ngeela mwoyi mupyamùpyà munda . . . Mvwa ndyà mbokà, bilùngà byà mpàtatà, ne nkùnde, ne minyìinyi, ànu mûndyadyà leelù ewu emu. Nènku mvwa ntàmba kulwa ne makàndà ne ndyunda dîbà dyònsò. Kadi pàngàakapetà bidimu bitwè ku makùmi àbidì ne bitaanu . . .

<sup>464</sup> Ndi ndyà bîmpè mpindyewu kutàmba byà musangu awu, nwènù bònsò bàdi bammányè, nudi bamanýè aci. Ndi mwà kudyà bitàmbe bwîmpè mpindyewu, mmutùdyadyà twètù bònsò. Kadi mbwà cinyi, Mwanèètù Eagan, dîbà adi, piikalàbi ne ndi mutùngùnùke ànu ne kudyà byàkudyà bitàmbe bwîmpè, byàbùngì kabìdi, maavitàminè matàmbe bwîmpè ne bikwàbò byònsò . . . Ne pândi ntàmba kudyà, ki pândi ngenda nteketa ku kakesè ku kakesè. Ne mpindyewu nkàadi ndwa muntu mukùlákàji wa makaaya makòbàme, ne mutù dîbàla, ne ntòloka mvyà, ne byanza byènda byèla minyèngù, mwìsù mwòndoka, makaaya àpwekelela, mu dîndà binkolela bwà kujuuka pa bulààlù, ne . . . Kaa, ekèlekèle. Bidi nàнку bwà cinyi? Piikalàbi ne ndi mvwija mwoyi wànyì mupyamùpyà misangu yònsò yìndyadyà, bwà cinyi bidi nàнку dîbà adi?

<sup>465</sup> Mèmè mpòngolwela màyi a mu mulòndò mu cilàwudì, ne àfika pankaci, ne pashìishe àbanga kupweka dîbà dyònsò pamutù pàà kubàndawù; ne pândi ntàmba kuàpòngolwelamù, mpàdiwu àtàmba kupweka lubilu. Ki bwalu mbwòbù abu’s. Ne kwènaku mwà kuciyaadikila ku maalu a mamanya bu byòbi bìkukèngela to. Mukàndà ewu ki cintu cimwèpelè bwà kujaadika ne Nzambì ngudi mukòse nàнку; ndìyi dipunga, Nzambì ùvwa mutùmòne tulwa.

<sup>466</sup> Nwènù balùme banunu, ne nwènù bakàji banunu, pàmwàpa bàmwè bàà—bàà kunùdi baabàyeenù ne bakàji bèenù bàkaadi bafwè. Aci kacyèna—aci kacyèna ciitàcisha to nànsha kakesè. Àlèluuyàh! Bàdi ànu dyàmwàmwa dyà ridò dyàdya, bindile; kakùyì mpatà to. Ne bòbò bàdi bàjinga kwikala cyàkàbidì neenù. Mmwòmò, ncyà bushùwà, ki cidìbo bàjinga. Bàdi bàjinga kwikala cyàkàbidì pàmwè. Bible mmwambè nàнку, misùukà yidi mwinshì mwà cyoshelu yidi yèla lubilà ne: “Mukalenge, too

ne dībà kaayi?” Nwamònu anyi? Kabèèna mu ngiikàdilù wabò mukumbàne to.

<sup>467</sup> Nzambi kaakatwènzakù Banjèlo to, wàkatwènza bantu balùme ne bakàji. Netwikalè misangu yònsò ànu bantu balùme ne bakàji, bwalu tudi ci—cintu cyangata ku meeji a Nzambi yéyè mwinè. Tudi mwà kwikala misangu yònsò ànu bantu balùme ne bakàji.

<sup>468</sup> Kàdi cidi cyènza cinyi? Nwamònu’s, pàmwàpa wèwè udi wela meeji ne pawàkayà ku cyoshelu apu, wèwè ne bàyeebè wa baaKapinga awu, nwènu kwamba ne tudi twangatangana muntu ne mukwendè bwà kwikala bu mukàji musèla mwanýishùbwe ne kusòmba pàmwè mu ngiikàdilù wa cijila wa dibàkà edi, ne ngàsà yà Nzambi ne bikwàbò, ne bujaadiki bwènu bwònsò bunùdi nufila abu, ne mucipù wènu wunùdi benzè awu. Katancì aka, nubanga kumòna, nwènu bònsò bàbìdi. Mulùme ùvwa mululàme, ne nsukì yìbàlakana; ne maman ne twìsù twèndè tulenga, tufiikùlùke atu, anyi mèsù a bleu, anyi cyònsò civwàku aci. Kaa, mùshindù mwinè wùvwà umutàngila’s. Wèwè uvwa upàtuka, utàngila papa ne: “Mpindyewu, olòlàku makaaya awu ùlùjè paanyimà’s”; kàdi paanyimà pàà cikondo àbanga kukòbama. Maman neàtolokè mvyà, binyòkà bìbanga ne bikwàbò. Ne paanyimà pàà cikondo, ki mukàji uyàaya wàwa, anyi mulùme uyàaya wàwa.

<sup>469</sup> Civwa ncinyi? Paakanùmònà Nzambi biimàne mwaba awu, Yéyè ne: “Ki cyòci aci, mùshindù awu ki wùndì Mèmè muswè bwà nwènu kwikala. Èyo. Wèwè lufù, lwàku, kàdi kwèna mwà kubàngata Mèmè ncìyi mukupèeshe dyanyisha to.”

<sup>470</sup> Kaa, kaa, ndi ngeela meeji kùdì Yobò. Èyowà, Nzambi ùvwa mutàngile panshì, Yobò ùvwa mumanyè ne Nzambi ùvwa mumunangè. (Kàdi mòna ne yéyè awu kèna mwà kukwangata to.) Kwamba Yè ne: “Umupyè mu byanza, kàdi kwàngaci mwoyi wèndè to.”

<sup>471</sup> Ki pashìishe katancì aka, makaaya àdi àbanga kukòbama, ne paanyimà pàà cikondo wèwè muyè. Ncinyi cidi cyenzèke aci?

<sup>472</sup> Mpindyewu, mu dibìikà dyà ku lufù kamwàkwikala kantu nànsha kàmwè kàà kàleeja lufù mu cimfwànyì to. Kamwènakù mwà kwikala kantu nànsha kàmwè kàà kàleeja buloba ebu mu cimfwànyì to, kàà cyà . . . Nwamònu’s, wèwè uvwa wenda ukola ku diswa dyà Nzambi, uvwa ne mwoyi. Pashìishe lufù lùbwela, lùkutònkola. Mwikàle udyà cyàkudyà cimwècimwè aci ne bikwàbò byònsò, unwà màyi a mùshindù wùm wèwùm wèwè awu, byònsò abi; kàdi lufù ndubwelè. Kàdi fòtò mmumana kukwàta’s. Àlèluuyàh! Mu dibìikà dyà ku lufù’s newikalè cyàkàbìdi ne mwoyi. Nènku kakwàkwikalakù lufù to, anyi cintu cifwànàngàne ne lufù, anyi bukùlàkàji, anyi balèmà anyi cinyi. Katùyi tufwà to, netwimanè mu difwànangana Nèndè, bapwàngaja bwà kashidi. Àlèluuyàh. Kaa, ndi . . .



Aci's ncifwànyine kwelesha muntu kanà yònsò ewu mbilà, nangànangà paùkaadi bukolè bwànyì ebu.

473 Bukolè bwànyì ebu, ngeela meeji, wèwè, mpaùdi welakù meeji, kutàmba byà kacya kwònsò eku. Wèwè udi ànu pa cikondo cyà nshintùlùkìlù aci, nudi numòna's. Kùdi... Udi ubanga kudìkonka ne: "Byònsò ebi bìdi cinyì? Cìndì mwenzè ncinyì?" Ntàngila paanyimà apa, ngeela meeji ne: "Kaa, Nzambi wanyi! Èè, dîbà dyàyi penyì's, Mukalenge? S'ki mèmè ewu, ne bidimu makùmi ànaayi ne mwandamukùlù, mu bidimu bìbìdi, nènkumbajè cyàbìbìdi cìmwè cyà lukàmà. Yoyóyò! Ndi ànu... Tàngilàayi ànu nùmonè ndambù wa misùùkà yìndi muPETÈ eyi; ndi muswè mpetèku mikwàbò miliyò ne miliyò." Nzambi, nkwaçishèku.

474 Ndi ndyùmvwà mene ne bundù bwà kwalukila kumbèlu bwà diikisha. Ndyàmbidila ne: "Kaa, dinowa dyàbobù, kàdi beena mudimu mbakesè. Miliyò mu mpèkaatù ne bundù ki kufwàyi ditùkù dyònsò eku, tèèlejà dibìikila dyàbò." Ndi nya kalààla bufùkù kuntwaku ngumvwà bampàngaanù bânà bakwàte ne byà luse abu bèèla mbilà mikolè mu ditùnga dyà kuntu kwàka adi. Mùshindù mwinè wùdìbo bàlwa binunu ne binunu, bàpulumunangana naanyi, ne—ne biimàne ku cipalu cyà ndèkè aku kùvwà kùkèngedii bwa bwà kwikalakù bampùlushi kuntwaku bwà kubàlamina pa bule, ànu bwà kuumvwà cyanàànà bwalu-bulonda bwà Yesù Kilistò.

475 Kàdi mùneemu tudi mwà kusèngeleelangana, ne kufila mamanyisha mu bibèjibeji ne bikwàbò byònsò, ne kupeta myaba yà mitàmbe bwìmpè yà kusòmbabò, dicyònkomojangana dyà ditàmbe bulenga ne misambu milenga, bàdi balwè kàdi bamba ne: "Aaaaa! Èè, ndi ngeela meeji ne bìvwà ànu bilenga's, kadi kì mbyà mu dyànyì diitabuuja to."

476 Kaa, ekèlekèlè, ntoo—ntoo—ntoo ne ku dîbà kaayi kùdibi mwà kushààla's? Kabyèna... kì mbìmpè to. Mùneemu ki twètù kwimanshangana ne mìntùta ne mìntùtá yà binunu byà kilò yà byàkudyà ku diyaala eku, pààbi bantu abu's mbafwànyine kubyàkidila ne disànka dyònsò. Bòbò's mbifùkùbwa byà pa buloba ebu byà mwomùmwe ànu ne twètù aba. Ekèlekèlè, twètù... Èè, awu ngenzèlù wa maalù kèna mwà kunènga ntàntà mupitèpìte bule nànsha.

477 Èyo, mpindyewu, Taatù Nganyi? Taatù ne Mwànà bàdi Umwe. Tàngilàayi, mu Yone wa Kumpàla 5.7, nCyambè ne: "Kùdi bàsàtù bàdi bàfila bujaadiki mu Dyulu, Taatù, Dìyi (dìdi Mwànà adi)... Taatù, Mwànà, ne Nyumà Mwìmpè: bàsàtù aba bàdi Umwe."

478 "Kùdi bisàtù bìdi bìfila bujaadiki pa buloba, bìdi mmàyi, mashi, ne Nyumà." Byòbì abi ki bintu bisàtù byàkapàtukà mu mubidi wà Kilistò. Bàakatùbula lubadi Lwèndè: màyi kupàtuka, Mashi kupàtuka: "Mu byanza Byèbè Ndi ndàmbula Nyumà

Wanyi.” Ki bwalu mbwabù’s, ki bintu bisàtù mbyòbì abi. Bisàtù ebi kabyèna umwe to, kàdi bidi *byùmvwangana* mu umwe.

<sup>479</sup> Taatù, Mwànà, ne Nyumà Mwímpè; Yone wa Kumpàla 5.7, ùdi wàmba ne: “Bàsàtù aba *bàdi* Umwe.”

<sup>480</sup> “Mâyì, mashi, ne Nyumà bìdi *byùmvwangana* mu umwe.” Kabyèna Umwe to, kàdi bidi *byùmvwangana* mu umwe. Pa nànkù Taatù . . . Ne cintu cìmwèpelè cìdiku mubidi mwà kwenza, pàdi Nzambì mwà kuDìmòna Yèyè mwinè, ne ku dinyooka dyàkapìcìlà mubidi ewu, kùdi dicyàmakana . . . diimanyika mwaba awu mene, nudi numòna’s. Ki pàdiYe ùmòna Mashi miimàne pankàci Pèndè ne cilumbulwidi. S’ki Dìyì Dyèndè edi, dyambè ne: “Ditùkù diwàdyàku, ki ditùkù dyùdi ufwà.” Ne apa Yesù mmwambè ne: “Ndi . . . Kàdi Mèmè ndi mwangàte kaaba kààbò. Wamònu’s, Mèmè ndi mwangàte kaaba kààbò.”

<sup>481</sup> Nudi bavùlùke kaabwalu kàanyì kalonda dilòlò adi mùmvwà mumòne cikèènà-kumòna cyà mukàji awu mubi menemene uvwa mu cibambalu amu awu anyi? Ne mèmè mvwa mmupìisha, ngamba ne: “Nzambì, bwà cinyi kùyìkù utayisha mwaba wònsò ewu?” Dìbà adi kundeejaYè *mèmè*, nwamònu’s. Ki mèmè kuya kudiye e kumwambila cìvwà cyenzèke aci.

Mpindyewu, lukonko lwànyì lwà ndekeelu ndwòlò elu.

**64. Udikù wèwè wela meeji ne, bilondèshile Mifùndu, beena Yudà nebùikalè . . . nebùitabè Kilistò pabwìpì menemene ne Dyambwibwa dyà Èkèleeziyà anyi?**

<sup>482</sup> Mèmè ndi—ndi—ndi bulelèlà ngiitabuujà ne Dyambwibwa dyà Èkèleeziyà . . . Ewu ngwanyì mmwènenù sungasunga, nwamònu’s. Nènku bu ne tuvwa ne dìbà, tuvwa mwà kucyàngata too ne ku ndekeelu, kàdi nyewu tukàadi—tukàadi bapite dìbà citèemà mpindyewu. Tàngilàayi, mèmè ndi bulelèlà ngiitabuujà ne beena Yudà nebàakidilè Kilistò ku Dilwa Dyèndè diibìdi. Mpindyewu vùlukàayi, bwà muntu ewu wàmònakù mwà kumanya nùnkù ne, mèsù ètu àkafofomijiibwa, anyi, mèsù àbò bòbò àkafofomijiibwa bwà twètù twamòna mwà kupeta lwètù lumònu. Muntu kanà yònsò ewu mmumanyè ne, Mifùndu nyìdi yàmba cyòci aci. Mmwòmò anyi? Pòlò ùdi ùtwàmbila ne ètù . . . ne twètù twàkafofomijiibwa . . . ne beena Yudà bààkafofomijiibwa bwà twètù twamòna mwà kwakidila Kilistò. Nwamònu anyi? Ne twètù tudi mucì wà cisuku wà olèwè wìkasomekiibwà mu mucì ku ditèekiibwa.

<sup>483</sup> Mpindyewu wanyì mmwènenù nyèyè ewu, nèngiikalè mwà kunùpèèsha ànu . . . Mbangeelè lukonko ne: “Udikù wèwè wela meeji . . . ?” Mpindyewu mùshindù ngwòwù ewu wùndi mèmè ngeela meeji ne ngwènzekàbi. Ncyèna mumanyè to. Cyònsò cìdiku aci, mèmè ndi mutwìshìibwe ne ku ngàsà wa Nzambì ne ku luse Lwèndè, netwìkalèku; nwamònu’s, ku ngàsà Wèndè, cyònsò cìdiku aci. Bidi mwà kwenzeka ne mpangè kucisùulakaja, kàdi cìndi mèmè ngeela meeji ncyòci eci. Ndi ngiitabuujà ne tudi

ku cikondo cyà nshìikidilu. Ndi mwitabùuje ne cikondo cyà bàà Bisàmbà byà bende cikaadi cyènda cijika mpindyewu mene. Ndi ngiitabuuja ne tukàadi ku ndekeelu.

<sup>484</sup> Nènku mpindyewu beena Yudà; bintu bibìdi bitù misangu yònsò ànu bishiye beena Yudà mu ntùpàkànyì mbyòbì ebi: Bòbò mbampofò, kabàvwa mwà kucimòna to; ne bwalu bàà Bisàmbà byà bendè, bwà cintu cìmwèpelè, misangu yàbúngì . . .

<sup>485</sup> Mwva nyiikilangana ne mwena Yudà kampànda ku Benton Harbor, Mwanèètù wa bakàjì Smith, kàdi nudi bamanyè cyàkangambilàye anyì? Kuntwaku ku wùmwè wa ku beena Izalèèlà abu. . . wà ku myaba yà Izalèèlà aku. Lukonko elu pa dyondopiibwa dya muntu mulùme mpofo awu. Ki yèyè ne: “Kanwèna mwà kukòsolola beena Yudà mu. . . Kanwèna mwà kukòsolola Nzambi mu bitùpà bisàtù kàdi kuMupèèsha mwena Yudà, nuMwenzela Taatù, Mwànà, ne Nyumà Mwímpè to.” Yèyè ne: “Kanwèna mwà kwenzela mwena Yudà aci to, twètù katwèna bakuukwidi bàà mpìngù nànsha.” Yèyè ne: “Twètù tudi twitabuuja Nzambi *umwèpelè*.” Nwamònu anyì?

<sup>486</sup> Kàdi nwènù nujuuka nuvwija Nzambi yisàtù: Nzambi Taatù, Nzambi Mwànà, ne Nzambi Nyumà Mwímpè; s’ncyà bushùwà ne nudi nufofomija mwena Yudà mwaba awu mene, bwalu yèyè mmumanyè cidì cìmpè. Yèyè’s mmumanyè bìmpè kutàmba aci. S’ncyà bushùwà ne aci cidì mwà kunùvwija nwènù bakuukwidi bàà mpìngù abu ànu mùdì dikuukwila dya mpìngù amu, nudi ne nzambi yisàtù. S’bikèngela nùyìvwijè Nzambi umwèumwè awu, kì nnzambi yisàtù to, mmidimu yisàtù yà Nzambi umwèumwè awu. Nwamònu’s, Nzambi wàkàkwàta mudimu mu buuTaataù, Wàkàkwàta mudimu mu buuMwànà, ne Ùdi ùkwàta mudimu mpindyewu mu cipungu cyà Nyumà Mwímpè. Ùdi n’Nzambi umwèumwè awu.

<sup>487</sup> Ki bwà cinyì tudi batùmìibwe ne mudimu bwà kubàtiiza mu Dìna dyà Taatù, Mwànà, Nyumà Mwímpè; bwalu, kacyi mu dìnà dyà . . . Mu *Dìna*, kì mmènà to; kì mmu mènà to, anyì mu dìnà dyà Taatù, mu dìnà dyà Mwànà, mu dìnà dyà Nyumà Mwímpè to; kàdi “mu Dìna dyà Taatù, Mwànà, ne Nyumà Mwímpè.” Nwamònu’s, kujingulula ne Nzambi umwèumwè awu ùdi n’Kìlistò. Nwamònu’s, aci kì cidìYe, kacyèna mwà kwikala mungà mùshindù to. Nwamònu anyì? Nènku Mifùndu . . .

<sup>488</sup> Nènku—nènku dibuulula dyètù dyòdì dyà mashimi, nànkù Peetèlò ne bakwàbò bàpostòlò abu bààkalongesha cintu cyà mashimi; bwalu muntu ne muntu mu Bible wàkabàtìijibwa mu Dìna dyà Mukalenge Yesù Kìlistò. Kacya muntu nànsha umwe kàakabàtìijibwakù mu dìnà dyà “Taataù, Mwànà, Nyumà Mwímpè” to, aci ndilongesha dyà Kàtòlikè. Mémè ndi mwà kunùjaadikilaci ku mèyì àbò sungasunga, ne nkòngamyakù yàbò sungasunga ne bikwàbò byònsò. Ntwitabàayi wa Kàtòlikè ne—ne kì ndilongesha dyà Bible to. Ne muntu nànsha umwe. . .

489 Nànsha mene Mfùmù wa Angleterre wàkabàtijiibwa mu Dîna dya Yesù Kilistò. Bidimu bitwè ku nkàmà yisambòmbò paanyimà pàà lufù lwà mùpostòlò wa ndekeelu, pàvwà ditùngà adi kadiyi dyanji nànsha kubiikidiibwa ne ng'Angleterre musangu awu to, divwà dibìkidiibwa ne "Ditùngà dya Banjèlo." Ki kùdidi difùmine, dîna adi. Yèyè kubàtijiibwa mu Dîna dya Yesù Kilistò.

490 Cyàkamukùdimwishà mucima, nkanyuunyi kakesè kàà mushààmushà. Pàvwà... Bu mèmè mwà kuvùluka, kí n'Saint Angelo to. Mpindyewu, dîna dyèndè ùvwa nganyi apa's? Agabus, Saint Agabus, ngeela meji ne mmùvwàdi. Mpindyewu, ncyàkutwishiiibwa bwà dîna adi to. Kadi, nànsha nànkù, yèyè wàkaya kuntwaku, ne bààkafikisha bàmwè bàà ku bòbò aba... .

491 Bàvwa bàbàbiiikila ne mbanjèlo, bwalu bantu abu ne beena Assyirie ne bakwàbò bàvwa ne mubidi mufiike, kadi ba-Anglais aba bàvwa bòbò ne nsukì mileepa, mitòòke, ne nsukì yà mvwàngalà, nsukì mitòòkòlòke, ba-Anglo-Saxons abu, nudi bamanyè's, ne mèsù a bleu. Ne bààkamba ne: "Bàvwa ne mmwènekelu wa Banjèlo." ki pa nànkù kwinyikabò ditùnga adi ne "Ditùngà dya Banjèlo."

492 Ki musadidi wa—wa Mukalenge awu kuyayè kuntwaku ne ùvwa munkaci mwà kuyiisha mfùmù wabò awu, ne bòbò bàvwa basòmbe mu mwaba munènè wà dyotela mudilu, wà pambèlu. Mwaba mbala bwalu-bulonda abu ànu àbìdi àdi panshi aa. Ki kanyuunyi kakesè kubùuka e kubwelakù mu bukènkè amu ne kwalukilakù pambèlu, ki mfùmù awu kwelayè lukonko ne: "Kanyuunyi aku kàvwa kafùme penyi ne kàayi penyi?" Nwamònu anyi? "Kààbwedi mu bukènkè, ne twètù twakàmònu, ne kàpàtuku kàayi cyàkàbìdì kabwela mu mîdimà. Mùshindù awu kí ngùdì muntu ùya anyi?" mwàkambàye.

493 "Kadi kàvwa cinyi kumpàlà kwà kubwelakù mwab'ewu?" mwàkambà muyiishi awu, nwamònu's. Aci kulengaci mfùmù awu; nènku pàakacyàbu mu dindà, yèyè ne bàà mu nzùbù mwèndè bààkabàtijiibwa mu Dîna dya Yesù Kilistò. Ncyà bushùwà.

494 Kadi pashiishe? Muntu wa kumpàlà wàkamyaminiiibwakù màyi anyi wàkabàtijiibwakù mu mùshindù mukwàbò mu dîna dya "Taatu, Mwànà, Nyumà Mwîmpè," ùvwa mmu èkèleeziyà wa Kàtòlikè. Dimyaminangana dya màyi dya kumpàlà dikaadiku dyenzèke, divwa mmu èkèleeziyà wa Kàtòlikè. Dipòngolwelangana dya màyi dya kumpàlà dikaadiku dyenzèke, divwa mmu èkèleeziyà wa Kàtòlikè. Èkèleeziyà wa Mishòonyi ùvwa misangu yònsò ànu ùbàtiiza... mu Bible, bàpostòlò, mu diinyijangana dya mu màyi mu Dîna dya Yesù Kilistò. Myaba yònsò. Anji petàayibi ànu mwaba wùmwe cyanàànà wùkaavwàbòkù babàtijiibwe mungà mùshindù, nwamònu's.

495 Mpindyewu, mu cyôci eci, cikondo cyà butumbi eci, beena Yudà kabèèna mwà. . . Ngâkakonka laabi awu, kwamba ne: “Laabi, mbifwànyineku kukukolela bwà kwitabuuja bapròfetà anyi?”

496 Yèyè ne: “Mémè ndi ngiitabuuja bapròfetà.”

497 Mémè ne: “Mu Yeshàayi 9.6, cìvwàye muswè kwamba ncinyi ne: ‘Bätùlelèdi Mwânà wa balùme?’ Ûvwa wàmba bwà nganyì?”

498 Yèyè ne: “Ûvwa wàmba bwà Maasiyà.”

499 Mémè ne: “Nàнку Maasiyà neàlediibwè anyi?”

500 Yèyè ne: “Ûvwa ne cyà kulediibwa.”

501 Mémè ne: “Dìbà adi pìikalàbi ne Yèyè ùdi ne cyà kulediibwa, Yèyè’s ùdi ne. . . Yèyè’s neikalè ne maamù.”

502 “Èyowà, Yèyè ùdi ne cyà kwikala ne maamù. Ne kàbidì, Ûdi ne cyà kwikala ne taatù,” mwàkambàye.

503 Mémè ne: “Kakùyi mpatà to. Nènku mbifwànyine kukukolela bwà kwitabuuja ne mbifwànyine kwikala. . . ne Nzambi Yèhowàh Munène Wàkakàngula Mbù Mukünze awu, kàvwakù mufwànyine kulela Mwânà ewu ku dilediibwa dyà kadiyi katobà anyi?” Nwamònu anyi? Bwalu kàdi kumwimanyina’s.

504 Yèyè ne: “Kàdi kanwèna mwà kuMuvwija nzambi yisàtù to.”

505 Mémè ne: “Yèyè kèna nzambi yisàtù to.” Mémè ne: “Ndipetangana kaayi dìikalàku pankaci pàà Maasiyà ne Nzambi?”

506 Yèyè ne: “Neikalè Nzambi.”

507 Mémè ne: “Bwà mpindyewu kaayi wâfiki. Bwà mpindyewu wâfiki, Yèyè ùdi Nzambi.” Aci mmùdici menemene.

508 Dìbà adi kuteetayè bwà kungambila, yèyè ne: “Èè, muntu awu ùvwa mwîvi, Yesù wa mu Nazàlèètà awu. Ûvwa mwîvi.”

509 Mémè ne: “Laabi, Yèyè ùvwa mwîvi bìshi?”

510 “Èè,” mwàkambàye, “mifündù yènu nwènu biinè ayi’s mmyambè ne ‘Yèyè wàkabwela mu budimi bwà blé mu ditùkù dyà Nsabatu, ne wàkangata blé.”

511 Mémè ne: “Mpindyewu, laabi, wèwè’s udi mumanyè cidi citàmbe bwîmpè. . . mumanyè Mifündu kutàmbe apu. Mifündù yènu nwènu biinè’s yidi yàmbe ne aci ncikumbànàngàne ne mikenji: ‘Mbyanyishiibwe bilondèshile mikenji bwà muntu kuyayè kadyà blé búngi bwònsò bùdiye muswè abu, kàdi kèedi mu mufuku bwà kuyayè nendè to.’ Mukenji wènu nwènu biinè’s, laabi.”

512 Ki kwimanayè mwab’awu ndambù, yèyè—yèyè—yèyè kuciitabuuja, bwalu wàkaciijaadika. Kwambayè, paanyimà pàà katanci, yèyè ne: “Èè, ncinyi—ncinyi cyakenzà ne mèsù a John. . .” Yèyè ne: “Wèwè wacyènji munyi?”

513 Mémè ne: “Mu Dîna dyà Yesù Kilistò.”

514 “Uh.” Yêyè—yêyè kàvwa mumanyè to; yêyè ne: “Èè, kwèna mwà kukòsolola Nzambi mu bitùpà bisàtù to.”

515 Mémè ne: “Yêyè ùvwa Yèhowàh mumwènèshìibwe mu mubidi, Laabi. Yêyè. . . Ki civwàYe ncyôci aci, Ûvwa Yèhowàh mu mubidi. Dîna Dyèndè Sungasunga dyà buntu, divwà Dîna dyà bupikudi, bwalu dîngà dîna kaditukù difidiibwe mwinshì mwà Dyulu didi muntu mwà kusungidiibwa ku dyòdi to, ànu ku Dîna dyà buntu dyà bupikudi adi: Mukalenge Yesù Kilistò. Ncyà bushùwà. Yêyè ùvwa Nzambi, Yêyè ùdi Nzambi, Yêyè neikalè Nzambi kashidi, ncyà bushùwà menemene, Mukalenge Yesù Kilistò.”

516 Mpindyewu, ndi ngiitabuuja ne èkèleeziyà wa bàà Bisàmbà byà bendè àbidì àdì panshi aa neikalè. . . dikumbaja dyà mubidi wà èkèleeziyà wa bàà Bisàmbà byà bendè. Biibi bidì pankaci pàà. . . Yesù wàkamba, mu Maataàyi 24, (nèngàngatè Mufùndù wùmwèpelè awu bwà katanci kakesè), Yêyè ne: “Nebàdyatakajè ku makàsà bimanu byà Yelusàlemà too ne pààjikà cipungu cyà bàà Bisàmbà byà bendè.”

517 Mpindyewu tàngilàayi. Cyàkafidiibwa kùdì Mukalenge wetù Yesù, mu Maataàyi 24 ne, beena Yudà nebùumushiibwè mu cimfwànyì aci. Danyèlè wàkamba, mu baprófetà bàà kale mwàmwa, mwambè ne nekwikalè mbingu makùmi mwandamutekète yicìvwa mikòsa, bwà beena Yudà. Ne Maasiyà ùvwa mwà kulwa (Mfùmù awu) ne ùvwa mwà kwamba ciprófetà munkaci mwà lumingu lwà makùmi mwandamutekète, yìvwa miikàlè bidimu mwandamutekète, Yêyè ùvwa mwà kuumushiibwa munkaci amu. Tàngilàayi mùvwàbi bipwàngàne, Yesù wàkayiiisha ànu menemene bidimu bisàtù ne citùpà ne wàkapoopediibwa pa nkùrusè. Kàdi kùdì bisàtù. . . Aci ncilwè buludì ku lukonko lukwàbò elu kaaba aka. Kùcidi bidimu bisàtù ne citùpà bibàkòsela, beena Yudà abu. Bidi ne cyà kwenzeka.

518 Mpindyewu bu nwènù mwà kwangata Bwàkabuulwibwà, nshapità wa 7, Yone wàkamòna binunu lukàmà ne makùmi ànaayi ne binaayi byà beena Yudà bònsò batwibwe citampi, bàà bisàmbà dikùmi ne bibidì byà Izalèlèlè. Nudi bamòne cindì njinga kwamba aci anyì? Kàdi mbidyànjlila kumòna ne nebyènzekè, bwà dilwa dyàbi.

519 Mpindyewu tàngilàayi mùdìbi bilenga, kumpàlà kwà twètù kujikija mpindyewu. Tàngilàayi mùdì—mùdìbi bìya. Mpindyewu, beena Yudà abu mbabwejiibwe mu mîdimà.

520 Mpindyewu, beena Yudà bàdì muneemu aba, bààbúngì bàà kùdìbo muneemu emu, bàdì ànu. . . s'nudi bamanyè mùdìbo, bóbò mbàdì balamè bubanji bwà pa buloba bujimà. Ne bóbò bàdì ànu—ànu bantu banangi bàà mfrangà, ne ki cyònsò cinùdiku mwà kupeta kwòkù aku, nwamònu's; ne mbadyàmbi bàà èyo, ne

kabàyi bàcyùka maalu, ne kabàyi bàtèèlejaku to. Kàdi, kí ng'abu bàvwàYe wàmba to, bu nwènù mwà kumòna.

521 Mpindyewu, bàà Bisàmbà byà bendè...Mpindyewu tàngilàayi, kùcidi kushàale bidimu bisàtu ne citùpà bwà beena Yudà aba. Mpindyewu, Yesù mmwambè ne cimenga cyà Yelusàlemà nebàcìdyatakàjè ku makàsà kùdi bàà Bisàmbà byà bendè too ne piikalà cipungu cyà bàà Bisàmbà byà bendè... (Mpindyewu, nwènù bàdi kanüyi nwitabuuja bipungu abu, nudi nwamba bìshi bwà aci?)...Too ne pààjikà cipungu cyà bàà Bisàmbà byà bendè. Nènku pààjikà cipungu cyà bàà Bisàmbà byà bendè (cikondo cyà bàà Bisàmbà byà bendè cyàjikì), pashiishe cimenga aci nebàcyàlùjilè beena Yudà. Ki Yesù kutungunuka ne kwamba ne lukòngò... Yèyè ne: “Panùdi nupàtuka numòna mucì wà mfigi wèla ntòngà, ne micì mikwàbò yònsò yèla ntòngà,” ne, “nudi numanya ne movù wà luuyà wùkaadi pabwìpi.” Yèyè ne: “Byà mwomùmwè kàbìdi panùdi numòna maalu aa ènzeka, nùmanyàayi ne cikondo cìkaadi pabwìpi, ku ciibi; ne bulelèlè Ndi nnwàmbila ne lukòngò elu kalwàkupita to maalu aa kaayi mùle.”

522 Mpindyewu, bòbò bàvwà bacindile mu lukòngò alu ne: “Ncyòci aci civwàYe wàmba.” Nànsha kakesè!

523 Tèèlejàayi! Yèyè wàkamba ne: “Lukòngò lùvwà lumòne mucì wà mfigi wèla ntòngà alu.” Mpindyewu tàngilàayi, Yèyè ne: “Mucì wà mfigi, ne micì mikwàbò yònsò.” Mpindyewu, mu ngaakwilù mukwàbò ne: “Nekwikalè ditàbuluja dyà buloba bujimà pa díbà adi.” Mpindyewu tàngilàayi cipròfetà eci, mùdici cìkwàta mudimu ne cìnwàngana ànu bipwàngàne. Mpindyewu tàngilàayi. “Micì mikwàbò yònsò yèla ntòngà, yitàbuluka.” Mucì, pàdiwu wèla ntòngà, wùdi wùfùululuka. Mmwòmò anyi? Mpindyewu, muntu kanà yònsò ewu, mulongeshi wa cipròfetà mmumanyè ne, mucì wa mfigi wùtu misangu yònsò ànu beena Yudà. Aci tudi bamanyè. Mbeena Yudà. Mpindyewu... .

524 Nènku tàngilàayi Yowèlè, pàakacyàngatàye, wàkamba ne: “Cyàkashiyàbo kùdi mukùmbi wà ngazama, mukùmbi wà hazilà wàkacìdya; cyàkashiyàbo kùdi mukùmbi wà hazilà, mukùmbi wà lokùsètà wàkacìdya; ne cyàkadyàbo kùdi mukùmbi wà lokùsètà...” Bu nwènù mwà kumòna, ncìshì ànu cìmwècìmwè aci, mu bitùpà bishìilàngàne: mukùmbi wà ngazama, mukùmbi wà hazilà, mukùmbi wà lokùsètà. Byònsò abi ncìshiishì cìmwècìmwè aci, cidi ànu mu bitùpà bishìilàngàne byà mwoyi wàci. Mpindyewu tàngilàayi, cìshiishì cìmwècìmwè aci cyàkabanga kudyà mucì wà beena Yudà awu kale wàwa, kuwùpulaci, ne cyàkabanga kudyà ne kudyà ne kudyà ne kudyà too ne mwàkafikàci ku cikuuku; kàdi pashiishe kwambayè ne: “‘Mémè nèngàalulululè,’ mùdi Mukalenge wàmba, ‘bidimu byònsò byàkadyàbo kùdi mukùmbi wà hazilà abi. Ne Nèmwijè cisàmbà Cyànyì cintu cyà disànka.’” Nwamònu anyi? Mpindyewu, mucì mmudya too ne kwinshì. Bàà

Bisàmbà byà bendè bààkasomekiibwamù, aci ncilelèlè. Èyo, bikèngela tükwamaàyi mamuma.

<sup>525</sup> Mpindyewu pààlwà cikondo cyà nshìikidilu, patwàpwekà too ne ku ndekeelu (pìikalàbi ne ndi mucimòne mu cyòci), Èvànjeeliyò ùdi ne: kùdi ne cyà kwikala ditàbuluja dinène munkaci mwà kwenzeka.

<sup>526</sup> Mpindyewu, nuvwakù bamanyè ne dibèndelà dyà beena Yudà ki dibèndelà dyà ditàmbe kwikala dyà kale pa buloba anyi? Ne ditu dishààle kadìyi dyènza cintu to munda mwà bidimu binunu bibìdi, bipite ne piinè apu, bitwè ku bidimu binunu bibìdi ne nkàmà yìtaanu. Dibèndelà dyà beena Yudà adi, dyà mùtootò wà matumba àsambòmbò dyà Davìdi adi, kaditu dipeepèku to munda mwà bidimu binunu bibìdi ne nkàmà yìtaanu; kacya ku dikwàciibwa dyà ku bupika dyà mu—mu Baabùlònà aku. Nènku mpindyewu, bwalu Bukalenge bwalàbàlè bwà beena Loomò bwàkabàkwàta ku bukòokeshi bwàbù (ne Maasiyà kulwa ne kuCibèngabò), ne kutangalajiibwabò ku mpeepèlè yinaayi yà pa buloba. Kàdi nukààvwakù bamanyè ne, mu matùkù àsambòmbò a ngondo mwitànù, cidimu cyà 1946, dibèndelà adi dyàkaalukila cyàkàbìdi pa Yelusàlèma anyi? Nukààvwakù bamanyè ne, mu matùkù mwandamutekètè a ngondo mwitànù, cidimu cyà 1946, Mwanjèlò wa Mukalenge wàkammwènekela (ditùkù dyàkalondà) kuntweku, ne muntùme pa buloba bujimà bwà kwenza ditàbuluja anyi? Dìndà mene dyàkalondà adi's! Pàakabàndà dibèndelà adi mu Yelusàlèma, pàvwà dibwela dyà dībà dyènzeka mu mapingaja amu, Mwanjèlò wa Mukalenge wàkamwèneka muneemu mu Ètats-Unis musangu wùmewùmwe awu. “Panwàmòna mucì wà mfigi ne micì mikwàbò yèla ntòngà!”

<sup>527</sup> Mbanganyi bàdi bavùlùke Mùtootò wàkalembèlèlè ku Musùlù wà Ohio eku awu, kùkaadi bidimu byàbùngi, pàakambàYe...S'ki fòtò waWù nyèyè ewu mucìkàlepù, pàakapwekàYe. Yèyè kwamba ne: “Mukenji wèbè newùpatukè bu mudyànjididi wa Dilwa dyà cyàkàbìdi, ànu mwàkapàtukà Yone bu mudyànjididi bwà Dilwa dyà kumpàla amu.” Ne, tàngilààyi, pa buloba bujimà mpatangàlèke ditàbuluja's. Misangu binunu makùmì kuvudija ku binunu ne binunu, ne ditàbuluja dinène.

<sup>528</sup> Beena ne ànu mikenji bònso, ne bashìlèshìilàngàne bònso bàà mu nyungulukilu wa ditùnga, ne èkèleeziyà minène kwambabò ne: “Matùkù a Billy Sunday àjiki.” Kàdi pàakamònàbo èkèleeziyà ùbanga kutàbuluka (bantu bèètù bàà pàtupù aba), bivwa bikèngela bwà kusùngilabò mpàlà wabò. Charles Fuller nùnkù yèyè nguvwa mwà kwikala mwangàte kaaba aku, kàdi ùkaavwa mutàmbe kukùlakaja; pa nànkù kuyabò ne Billy Graham. Ki Nzambì kwangata Billy Graham, anyi, èkèleeziyà wa ba-Baptistes ngwàkamwangata, ki bòbò bònso kumunyungulukilabò. Kàdi Billy Graham kèna wa



cyàbìbìdì cìmwè cyà muyiishi mùdì Mwanèètù Neville to, bwà kwikala ànu muyiishi, kabiyi ku . . .to, nànsha kakesè. Kàdi ncinyi aci? Bìvwa bikèngela bwà kucyènzabò, cìdì nndongolwelu, ne bantu bònsò bacinyùngùlùkile buludì, bacikùngwile. Billy's ùdì wàmba cintu cìmwècìmwè aci. Nwamònu's, bìvwa bikèngela bwà kucyènzabò. Ne bìvwa bikèngela bwà kwenjiibwaci bwà kuuja Dìyi dyà Nzambì. Kabàvwa ne Nyumà bwà kudikùngwijabò to, pa nàнку bìvwa bikèngela bwà kwangatabò Dìyi bwà kudikùngwilabò; ki kwenzabò nàнку. Ne Billy yèyè mmuyiishi wa Dìyi, ne mwìmpè be, ki kumukùngwilabò; ki aci kubwejacì byònsò byà mashikà byà kwìsùkwìsù mu didikùngwija dyàbò adi. Ne Kampànda mutàmbe mfùkìlu, mwikàle ne dyondopa dyà kùdì Nzambì, ne makolè ne byenzi ne bikwàbò, ku bishimà byà Nzambì, kutèeka cyòci eci. . . Èkèleeziyà, Mukàjì-musèla mwambwibwe udi ne Maanyi mu mwèndù Wèndè awu, kuMubweja mu ditàbuluja. Nwamònu anyi? Ki èkèleeziyà wa mashikà wa bintu byà kwìsùkwìsù awu kupetayè dyèndè ditàbuluja. Kàdi's ki Izalèlèlè ewu wàlukila mwikàle ne ditàbuluja.

<sup>529</sup> Ndi ne mukàbà wà bindìdimbì mu nzùbù mwànyì mwàmwa mpindyewu: *Tusunsa Tùsàtù Kumpàlà kwà Mundankùlù*. Ne tudi ne mukàbà wà bindìdimbì wà beena Yudà abu bàalukila. Bàalukila; nutu bacimòne mu cikàndàkàndà cyà *Look*. Ne màzuwà a màyi, mapàya muuja tètè, àfùmina mu Iran mwàmwa ne kuntu kwònsò aku; kacya beena Yudà abu kabàvwakù bamanyè ne Yesù ùkaavwakù pa buloba to, bàakaya kuntwaku mu dikwàciibwa ku bupika kùdì Baabùlònà. Ki cyònsò ciwàbò bamanyèku ncyòci aci. Bàvwa bàdima. . . nuvwa bacimòne mu cikàndàkàndà cyà *Look* anyi cyà *Life* ne bikwàbò, myaba yìvwàbò bàdima ne milabì yà kale yà micì. Nènku pààkamònàbò ndèkè ayi yìbwela, bàakadyàmbedila ne: “Ki cyòci eci.” bwalu Nzambì ùvwa mubàmbile ne “bàvwa mwà kwikala kuntwaku, ne bàvwa ne cyà kwalujiibwa ku Yèlusàlèmà pa mapwàpwà a mikanku.” Ncyà bushùwà. Ki bòbò abu's. Ki beena Yudà abu kwambabò ne: “Ki cyòci eci.” Kubàndabò buludì mwòmò amu, ne tudi ne maafòtò ne mēyi àbò sungasunga, ne bòbò kubèèla nkonko; bàfùmina pa buloba bujimà. Bàmwè bàà kùdìbò bambùle bakùlākājì bààbò paanyimà, ne bampofò ne bikalàbà. Nènku bàvwa bàtùuluka ku màzuwà a màyi aku bàfùmina ku bitùpà bishìilèshìilàngàne byà pa buloba, bàalukila.

<sup>530</sup> Ki kubangabò kwangula mabwe panshi apu, bàèla mu mifuku; kàdi leelù ewu mbasangàne mishimì yà màyi, mbashààle ditùngà ditàmbe, didì ditàmbe bunène pa buloba mu maalu a madimi. Mbù Mufwè ùdì ne mabanji kutàmba myaba mikwàbò yònsò yà pa buloba misanga ntete. Beena Yudà bàdi munkaci mwà kwalukila; ncisokoka bàà Bisàmba byà bendè, kàdi ki kusampilabò bu cilòngò cyà rose eku.

<sup>531</sup> Kubàmbilabò—beena Yudà abu, kubàmbilabò ne: “Nudi

nwalukila bwà kufwila mu buloba bwènu.”

532 Bòbò ne: “Tudi twalukila bwà kumòna Maasiya. Yèyè mwinè ùdi penyì? S’Ùdi ne cyà kwikala mùneemu.”

533 Mwanèètù, paùdi umòna mucì wà mfigi awu wèla ntòngà, Yèyè wákamba ne: “Lukòngò elu kalwàkujikakù to byònsò kabiyi byùle.” Tàngilàayi ditàbuluja didi ne beena bintu byà kwisùkwisù aba adi. Tàngilaaayi ditàbuluja didi ne Èkèleeziyà adi. Tàngilàayi ditàbuluja didi dibwelà ne beena Yudà adi, mbindile dilwa dyà Maasiya. Èkèleeziyà, Èkèleeziyà udi mùle tètè ne Nyumà, Mukàji-musèla udi ne...baavirgò bàdi ne maanyì mu myèndù yàbò abu nebàbwelè mu Didya dyà Dibanji.

534 Beena Yudà nebàmbè ne: “Eci ki cyòci aci. Ki Nzambi wetù utùvwà bindile wàwa.” Ki mwaba wùdi binunu byènu lukàmà ne makùmi ànaayi ne binaayi. . .pàvwà ba-Russellistes bapètèle cibwejàkàji mpòpù apu. Ki beena Yudà abu mbòbò abu biimàne mwaba awu biikalà mwà kuMwakidila. Bòbò ne: “Ki Nzambi wetù utùvwà bindile wàwa.” NebàMumònè, bàmbe ne: “Nkwèpì k’Ùdi mubipètèle? Nkwèpì k’Ùdi mupètèle bibangu bidì mu cyanza Cyèbè abi?”

535 Yèyè ne: “Ndi mubipètèle mu nzùbù wa balundà Bàànyì.” Ncyà bushùwà ne: “Nzùbù wa balundà Bàànyì.”

536 CyènzàYe ncinyi? Èkèleeziyà wa bàà Bisàmbà byà bendè neikalè mwangàciìbwè mu Butùmbi ne Mukàji-musèla musèdiìbwè kùdi Kilistò.

537 Mmunyi mwàkadìmanyishà Yòzefù kùdi bàà kwabò? Wàkuumusha muntu yònsò wa bàà Bisàmbà byà bendè mu bwikadi bwèndè. NcyàkenzàYe cyà bushùwà. Ncinyi cyènzekelà bàshàadilè bàà dimiinu dyà mukàji? Dragon wàkapwìdijila màyi a mukana mwèndè bwà kwenzayè mvità; Yesù wákamba ne, “nebèèdiìbwè mu mìdimà yà pambèlu, ne nekwikalè myadi ne ditwà dyà mikèmù ne disumakaja dyà ménù,” mèbà manènè a dikèngeshangiìbwa ne mateeta nebifikilè èkèleeziyà wa bàà Bisàmbà byà bendè.

538 Ncinyi cyènzekà dìbà adi? Pààlwà dishebeyiìbwa bwà diitabuuja, piikalà Nzambi mutàpùlùle bintu byònsò ne beena Yudà kuntu kwàka, Yesù nealukilè mwàkaalukilà Yòzefù amu. Pààkumvwàbò Yòzefù, pààkuumushàye balami bèndè bònsò ne bikwàbò byònsò, ne kumònayè Benyàminà mutekète awu ne bakwàbò abu biimàne mwaba awu, ne bòbò munkaci mwà kunyingalala bwà mùvwàbò bashebèye Yòzefù. Bàvwa bèela meeji ne bàvwa bashebèye Yòzefù, kàdi’s ki yèyè ewu mwimàne kumpalà kwàbò. Kwambayè ne: “Mmémè Yòzefù. Mmémè mwanèènu awu.”

539 Ki kuzakalabò ànu cyà bushùwà ne: “S’n’Yòzefù. Mpindyewu twàmumanyi.”

540 PàmbàYe ne: “M’Mémè Yesù. M’Mémè Maasiya awu.”

541 Nebámbe ne: “Kaa, ekèlekèle, mpindyewu citwàpeta’s!”

542 Byònsò abi byàkenjiibwa bwà butumbi bwà Nzambi. Kabyàkwikala ne Yèyè ùdi. . . Èè, bàwwa mwà kuumvwa ùdila too ne mu nzùbù wa bukalenge wa Pàlò, Yòzefù ùdila bwàbò bòbò.

543 Indìlaayi too ne pààmònà Yesù beena Yudà bàwàbi bìkèngela bwà Yèyè kuvwija mpofo abu bwà kutùshiila twètù bàà Bisàmbà byà bendè aba mpungà bwà kubwela, aci’s neciikalè díbà, mündi nkwàmbila. Yèyè neàngatè beena Yudà abu, nwènù kanùpampakanyikù to, beena Yudà abu nebàsungidiibwè. Èyowà’s, mukalenge, bìkèngela diikalèku. Nènku ki wanyì mmwènenenu wa cyòci aci, ncyèna mwà kucimònakù mwaba mukwàbò kàmpànda mu Mifundu to. Bìkèngela ùlamè bàsàtù abu pàmwè, cyàkàbìdì.

544 Bìkèngela nùlamàayi virgò mu—mukùtakàne, è—èkèleeziyà udi ànu wa ku dìnà, wa ku mishiku awu, nwamònu’s. Bìkèngela nwàngatè èkèleeziyà. . . Mbwena kwamba ne, mwena Yudà dyàmbedi, mwena Yudà dyàmbedi, yèyè udi ànu muntu mufofomija udi mwindile ku luseke awu awu. Bìkèngela nwàngatè citùpà cidi cìlondà, mbwena kwamba ne virgò mukùtakàne, uvwa ne njingàjingà, ne ùpàtuka ànu cyanààna ùya mu èkèleeziyà, ne ùkashàala wa mu èkèleeziyà, ne mwikàle muntu mwimpèku awu. Pashiishe bìdì bìkèngela bwà nwènù kwangata Èkèleeziyà, wa nyumà, Dyambwibwa, Mukàji-musèla, ki yèyè udi mwimàne wàwa. Bantu bàsàtù abu, kwèna mwà. . . kì mbasambàkàne to, nànsha kakesè. Kabèèna bònsò bàmwè to. Kì ncidì Bantèmù bàà Yèhowàh bàmba ne, “kùdi binunu lukàmà ne makùmì ànaayi ne binaayi bìdì Mukàji-musèla” aci to; aci ncyà mafi. Abu mbeena Yudà, nwamònu’s. Kùdi Mukàji-musèla, beena Yudà, ne virgò mukùtakàne. Nènku nudi nubàngata bònsò, nwamba ne: “Èè, bàdi bònsò bàsàtù mu myaba mishilàngàne.” Bònsò abu, bàdi mu bitùpà bisàtù bishilàngàne byà bantu. Bushùwà, kabèèna mwà kucyènza to.

545 Díbà adi pààlukilà Yesù pa buloba. . . Beena Yudà, bàdi cinyi? Batungula bàà ku ntempèlù. Nènku pààlukilà Yesù, Ùdi ùlwa ne Mukàji-musèla. Yesù ùdi ùlwa misangu yisàtù: Wàkalwa musangu wà kumpalà bwà *kupikula* Èkèleeziyà Wendè, Ùdi ùlwa musangu mwibìdì bwà *kwangata* Èkèleeziyà Wendè, Ùdi ùlwa musangu mwisàtù ne Èkèleeziyà Wendè. Nwamònu anyi? Menemene. Pa nàнку cidi cyònsò dilwa dimwèpelè dinène dipwàngàne, cidi cyònsò Nzambi umwèpelè munènè mupwàngàne; cidi cyònsò Kilistò umwèpelè munène mupwàngàne; Èkèleeziyà umwèpelè munène mupwàngàne, bupikudi bùmwèpelè bunène bupwàngàne. . . byònsò; cidi cìlwa búsàtù, kàdi byònsò bìdì mu Umwe. Nwamònu anyi? Kì mbantu bàsàtù, *bikampàndà* bisàtù to; cidi ànu Mupèrsonà umwèpelè, Èkèleeziyà umwèpelè, Mubidi wùmwèpelè, Kilistò umwèpe;è,

Mukalenge umwèpelè “munda mwènù bônso, ne ku nwènù bônso,” ne bikwàbò mùshindù awu. Byónsò umwèpelè!

546 Mukalenge ànùbènèshè. Ndi munùlamè ntàntà mule be.

547 Bu Mukalenge mwà kwanyisha, mpindyewu, bu mèmè mwà kwalukila cyàkàbìdì mu ndambù wa malòòlò, anyi mu dilòòlò dyà dyàlumingu kampànda anyi cintu kampànda cyà mùshindù awu, mpaasàtà ewu yéyè kàyi ne cintu kampànda pa mwoyi wèndè to, nènてete bwa kwandamuna ku nkonko eyi. Kaa, kùdi yà mîmpè be kaaba aka. Mbanganyì bàdì baswè kuyitèleja? Kaa, mèmè ndi ànu muyinangè's. Ngànji nyibalèku cyàkàbìdì, ànu lùkàsàlùkàsà, kumpàlà kwà twètù kwalujila mpaasàtà bulombodi bwa disangisha.

548 Tèelejàayi ànu eci cyanààna:

**Mpenyi pàdì mabwe àleej- . . . ? Mabwe awu àdì àleeja cinyi mu Bwàkabuulwibwà, 21? Alu's ndwà lwîmpè.**

**Umwijàku nyama yînaayi yà mu Bwàkabuulwibwà 5 ayi.** Lukwàbò lwà lwîmpè ndwòlù alu.

**Bakùlù makùmi àbìdì ne bànaayi abu mbanganyì? Ki lukwàbò lwà lwîmpè ndwòlù alu, nwamònu's.**

**Mwonji mukùnzè wà mu Genèsè 38 awu wùvwa wùmvwija cinyi?** Nudi bavùlùke's, yéyè wàkaya kangata mukàj'a mwanèndè sungasunga ne wàkalààla nendè cyenzè bu ne ùvwa ndumbà; ne wàkatwà mushinga ne wàkalwa; ne pashìishe pàakalwà mwànà, bàakamuswika mwonji mukùnze ku cyanza (wàkacisàka pambèlu kàdì pashìishe kwalukilayè cyàkàbìdì munda), uvwa—uvwa ulonda awu kumudyànjidilayè. Kaa, alu's ndwà lwîmpè's; ndwîmpè cyà bushùwà.

**Mmapà kaayi àdì àkèngelà kutùma pa bìdì bitàngilà lufù lwà bantèmù bàbìdì bàà mu Bwàkabuulwibwà 11 abu?** Apu mpàalukilà Mòsà ne Eliyà bwa ditàbuluja dyà binunu lukàmà ne makùmi ànaayi ne binaayi ebi. **Màpà awu ncinyi?** Tàngilàayi nùmonè cìdiwu, alu's ndwîmpè be.

**Bansantu nebìikalè penyi paanyimà pàà bidimu cinunu byà... (lwà lwîmpè's ndwòlù alu, balùmyànà. Nekwìkalè... )... bukòòkeshì? Nebìikalè ne mubidì wà mùshindù kaayi?**

**Mmunyì mutwàlumbulwishà banjèlo?**

**Bwà cinyi nsukì yidì yilwa yà banjèlò mu Kolintò wa Kumpàlà? Mu Mukàndà wà Kolintò wa Kumpàlà.** Nkonko mîmpè, mîmpè menemene.

549 Mukalenge ànùbènèshè. Ndi ntèkemena ne Mukalenge neàtwányishile bwa kudìsangisha ne kuyiikilangana pa bintu ebi, byónsò mbwà butùmbì Bwèndè. Tudi bafwányine kupangakana pa mmwèneni pa byòbì abi; kàdì nèngàmbè cintu


cimwè ne, bu nwênù bônsò mwà kupeta disànkà dyàbúngì mu dibitèeleja múnđì mêmè naadì mu dibyàm̄ba emu, tudi tupìcila mu cikondo cyà dicyònkomoka. Amen. Amen.

<sup>550</sup> Èyo, Mukalenge ìkalèku mwímpè menemene kunùđì mpindyewu. Kanùpu masangisha awu mwoyi to. Diiyiisha dyà ku tudyòmbà dyà Mwanèètù Neville, mpindyewu, nku WLRP, mu diisambòmbò mu dindà pa dībà citèemà jaajaaja; ngimbilù wa tungìmbà tūnaayi wa Neville awu, ne ndi mutwishibwe ne nebànwénzèlè bímpè, nùkangulàayi bisanji byènú nùbàteelejè. Ne mêmè ne mùshindù, mêmè mwalùkile pa dībà, anyì mumòne ne nêngiikalè mwà kwalukila, nêmbiikilè mukàjàanyi ku tèlefonè; bu Mukalenge mwà kungaanyishilakù bwà kuya kamòna Mwanèètù munanga mukùlumpè Bosworth. Ndi... Nwênù bônsò... nènku nêngàalukilè mu dyàlumingu dilòlò.

<sup>551</sup> Mukalenge ìkalèku mwímpè menemene kunùđì mpindyewu. Nènku mwanèètù, mpaasàtà, anjì vwilàku apa bwà katancì kakesè cyanààna; nènku yèyè àngatè bulombodi bwà disangisha. Nènku:

Kanùpu mwoyi disambila dyà mu dīkù to,  
Yesù ùtu muswè kutwilanganamù neenù;  
Yèyè neàngatè lutàtù ne lutàtù lwènù lwònsò,  
Kaa, kanùpu mwoyi disambila dyà mu dīkù to,

<sup>552</sup> Nudi banangè aci anyi? Mbanganyi bàtù bàsambila mu nzùbù mwàbò sungasunga? Tùmonàayibi, bônsò...bônsò... Abi mbímpè, ikalà nushàalaayi pabwìpì ne Nzambì. Ikalaayi bímpè, nwênù bānà bakesè, Nzambì neànùbènèshè.

Èyo, Mwanèètù Neville. 

57-1002 Nkonko Nè Mandamuna Pa Ebèlu Citùpà II  
Branham Tabernacle  
Jeffersonville, Indiana États-Unis

CILUBA

©2023 VGR, ALL RIGHTS RESERVED

VOICE OF GOD RECORDINGS  
P.O. BOX 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Dîyi dya bwena-cintu

Makenji ônsò tudi badilamininyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiyi bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS

P.O. BOX 950, JEFFERSONVILLE, INDIANA 47131 U.S.A.

[www.branham.org](http://www.branham.org)